

摘藻堂四庫全書薈要

史部

欽定四庫全書薈要

史部

文獻通考卷五十一

詳校官員外郎臣潘紹觀




欽定四庫全書薈要卷九千三百七十一

史部

文獻通考卷五十一

鄱陽馬端臨貴與著

職官考五

中書省

中書之官舊矣謂之中書省自魏晉始焉梁陳時凡國之政事並由中書省省有中書舍人五人領主書十人

書吏二百人

書吏不足并取助書

分掌二十一局事各當尚書諸

曹並為上司總國內機要而尚書唯聽受而已被委此

官多擅威勢後魏亦謂之西臺

宣武帝謂中書監崔光日卿是朕西臺大臣

北齊中書省管司王言并司進御之樂及清商龜茲諸

部伶官隋初改為內史省置令二人侍郎四人

煬帝減侍郎二

人舍人八人

煬帝減去四人

通事舍人十六人煬帝加起居舍

人而改通事舍人為謁者臺職唐武德三年復中書省

龍朔二年改為西臺咸亨初復舊光宅元年改為鳳閣

凡中書官隨署名改

神龍初復舊開元元年改為紫微省五年復

舊

時謂尚書省為南省門下中書為北省亦謂門下省為左省中書為右省或通謂之兩省

令二人

侍郎二人舍人六人右散騎常侍起居舍人右補闕右拾遺各二人通事舍人十六人其餘小吏各有差

宋制中書省在左掖門外西面北廊掌進擬庶務宣奉命令行臺諫章疏羣臣奏請興創改革及中外無法式事應取旨者凡除省臺寺監長貳以下及侍從職事官外任監司節鎮知州軍通判武臣遙郡橫行以上除授皆掌之凡命令之體有七曰冊書立后妃封親王皇子

大長公主拜三師三公三省長官則用之曰制書處分
軍國大事頒赦宥德音命尚書左右僕射開府儀同三
司節度使凡告廷除授則用之曰誥命應文武官遷改
職秩內外命婦除授及封叙贈典應合命詞則用之曰
詔書賜待制大卿監中大夫觀察使以上則用之曰勅
書賜少卿監中散大夫防禦使以下則用之曰御札布
告登封郊祀宗祀及大號令則用之曰勅榜賜酺及戒
勵百官曉諭軍民則用之皆承制畫旨以授門下省令

宣之侍郎奉之舍人行之留其所得旨為底大事奏稟
得旨者為畫黃小事擬進得旨者為錄黃凡事干因革
損益而非法式所載者論定而上之諸司傳宣特旨承
報審覆然後行下設官十有一令侍郎右散騎常侍各
一人舍人四人右諫議大夫起居舍人右司諫右正言
各一人分房八曰吏房曰戶房曰兵禮房曰刑房曰工
房曰主事房曰班簿房曰制勅庫房元祐以後析兵禮
為二增催驅點檢分房十有一又改主事房為開拆

中書令

舜攝位命龍作納言出入帝命周官內史掌王之八柄
爵祿廢置生殺予奪執國法及國令之貳以考政事蓋
今中書之任其所置中書之名因漢武帝游宴後庭始
以宦者典事尚書謂之中書謁者置令僕射

不言謁者
省文也

元帝時令弘恭僕射石顯秉勢用事權傾內外蕭望之
以為中書政本宜以賢明之選更置士人自武帝改用
宦者掌出入奏事非舊制也武帝建始四年改中書謁

者令曰中謁者令更以士人為之皆屬少府漢東京省

中謁者令官

時有中官謁者令非其職也

魏武帝為魏王置祕書令

典尚書奏事又其任也文帝黃初初改為中書令又置

監以祕書左丞劉放為中書監右丞孫資為中書令並

掌機密中書監始於此也及明帝時中書監令號為專

任其權重矣

時中護軍蔣濟上疏諫曰夫大臣太重者國危左右太親者身蔽古之至戒威權在

下則衆心慢上勢之常也今外所言輒云中書實握事要日在目前倘因疲倦之間有所割制衆臣見其能推移於事即亦迴附向之請分任衆官不使聖明之朝有專吏之名也晉因之置監令一人

始皆同車後乃異焉

初監令常同車入朝及和嶠為令荀勗為監嶠意抗鄙荀巧佞以意

氣加之專車而坐自此監令乃使異車

魏晉以來中書監令掌贊詔命記

會時事典作文書

司馬景王命中書令虞松作表再至不可意松竭思不能改正鍾會視其

草為定五字松大悅服又荀勗為中書監使子組草詔傳祇為監病風又使息暢為啟華廙為監時成事多不洩廙啟武帝召授子蒼草詔前後相承以子弟管之自此始也又王獻之為中書令啟瑯琊王為中書監表曰中書職掌詔命非輕才所能獨任自晉建國嘗命宰相參領中興以來益重其任故能王言彌徽德音四塞者也又後魏孝文時蠕蠕有國喪帝遣高閭為書與之不叙凶事時孝文謂曰卿為中書監職典文辭若情思不至應謝所任又曰崔光為中書令勅光為詔以其地在遠巡不作蒼烏隊切廙余力切蠕如究切

樞近多承寵任是以人因其位謂之鳳凰池焉

荀勗守中書監

侍中參贊朝政及遷尚書令勗久在中書專管機事失之甚愠人有賀者勗怒曰奪我鳳凰池諸公何賀焉

晉制銅印墨綬進賢兩梁冠絳朝服佩水蒼玉乘輅車

吳紀亮為尚書令其子騭為中書令每朝會吳主以屏風隔其坐晉書曰張華為監裴楷為令共掌機密又王洽字敬弘為中書令時年二十九後洽子珉又為中書令時謂為奕世令德

東晉常併其職

入散騎省尋復置之宋冠佩印綬與晉同梁中書監令

清貴華重大臣多領之其令舊遷吏部尚書才地俱美

者為之陳因梁制後魏亦有監令

高允字伯恭為中書令文帝重之不名呼

為令公北齊因魏制後周置內史中大夫二人掌王言亦

其任也隋初改中書為內史置監令各一人尋廢監置

令二人煬帝大業十二年又改內史為內書後復為內

史唐武德初為內史令

常有勅而中書門下不時宣行高祖責其遲由內史令蕭瑀曰

臣大業之日見內史宣勅或前後相乖者百司行之不知何所承用所謂易雖在前難必在後臣在中書日久備見其事今黃閣初構事涉安危若遠方有疑恐失機會此每受一勅臣必審勘使與前勅不相乖背者始敢宣行遲晚之愆實由於此上善之三年改為中書令亦置二人龍朔二

年改為右相咸亨元年復舊光宅二年又為內史神龍

元年復舊中書令開元元年改為紫微令五年復為中

書令天寶元年改為右相

至德初復為中書令自隋至今皆為宰相舊班正三品大

歷二年升為從二品

按令文掌侍從獻替制勅冊命敷奏文表授

冊監起居注總判省事

宋制掌佐天子議大政授所行命令而宣之祀大神祇則升壇饗宗廟則升阼階相禮臨軒冊命則讀冊建儲則升殿宣制及璽綬以授太子大朝會則詣御座前進方鎮表及祥瑞國朝未嘗真拜以他官兼領者不與政

事然止曹佾餘皆贈官官制行以右僕射兼中書侍郎
行令之職別置侍郎以佐之元豐寄祿為開府儀同三
司

容齋洪氏隨筆曰中書尚書令在西漢時為少府
官屬與太官湯官上林諸令品秩畧等侍中但為
加官在東漢亦屬少府而秩稍增尚書令為千石
然銅印墨綬雖居機要而去公卿甚遠至或出為
縣令魏晉以來浸以華重唐初遂為三省長官居

真宰相之任猶列三品大歷中乃升正二品入國
朝其位益尊叙班至在太師之上然只以為親王
及使相兼官無單拜者見任宰相帶侍中者才五
人范魯公質趙韓公普丁晉公謂馮魏公拯韓魏
公琦尚書令又最貴除宗王外不以假人趙韓公
韓魏公始贈真令韓公官止司徒及贈尚令乃詔
自今更不加贈蓋不欲以三師之官贅其稱也政
和初蔡京改侍中中書令為左輔右弼而不置尚

書令以為太宗皇帝曾任此官殊不知乃唐之太宗為之故郭子儀不敢拜非本朝也

又曰紹熙五年十二月二十二日宣麻制除嗣秀王伯圭兼中書令此官久不除學士大夫多不知本末至或疑為當入都堂治事邸報至外郡尤所不曉邁考之典故侍中中書令為兩省長官自唐以來居真宰相之位而中令在侍中上肅宗以後始以處大將故郭子儀僕固懷恩朱泚李晟韓弘

皆為之其在京則入政事堂然不預國事懿僖昭
之時員寮多率由平章事遷兼侍中繼兼中書令
又遷守中書令三者均稱使相皆大勅繫銜而下
書使字五代尤多國朝創業之初尚仍舊貫於是
吳越國王錢俶天雄節度符彥卿雄武王景武寧
郭從義保大武行德成德郭崇昭義李筠淮南李
重進永興李洪義鳳翔王彥超定難李彝興荆南
高保融武平周行逢武寧王晏武勝侯章歸義曹

元忠十五人同時兼中書令太宗朝唯除石守信而趙普以故相拜真宗但以處親王嘉祐末除宗室東平王允弼襄陽王允良元豐中除曹佺與允弼允良相去十七八年爵秩固存沈括筆談謂有司以佺新命言自來不曾有活中書令請俸則例蓋妄也官制行改三使相並為開府儀同三司元祐以後不復有之雖崇觀政宣輕用名器且改為左輔右弼然蔡京三為公相亦不敢居乾道中詔

於錄黃及告命內除去侍中中書令遂廢此官今
當先降指揮復置則於事體尤愜當也嗣王終不
敢當於是寢前命而賜贊拜不名

侍郎

漢置中書領尚書事有丞郎魏黃初初中書既置監令

又置通事郎

魏志曰掌詔草即漢尚書郎之位

次黃門郎黃門郎已署

事過通事乃署名已署奏以入為帝省讀書可後改通

事郎為中書侍郎

明帝詔舉中書郎謂盧毓曰得人與否在盧生耳又魏末張華遷掌魚中

書郎朝議表
奏多見施用

晉置四員及江左初又改為通事郎尋復

為中書侍郎其職副掌王言更入直省五日從駕則正

直從次直守

張華為中書郎從駕征鍾會掌書疏表檄
嵇含為中書郎書檄雲集含初不立草

宋中書侍郎進賢一梁冠介幘絳朝服用散騎常侍為

之齊梁皆四人梁以功高者一人主省內事陳因之後

魏北齊置四員隋初為內史侍郎亦四員煬帝減二員

改為內書侍郎唐初為內史侍郎武德三年改為中書

侍郎龍朔以後隨省改號而侍郎之名不易

舊制正四
品至大歷

二年升
從三品
員二人掌侍從獻替制勅冊命敷奏文表通判

省事

宋制侍郎掌貳令之職參議大政授所宣詔旨而奉行
之官制行以尚書右僕射兼又別置侍郎以代參知政
事建炎初復改侍郎為參政

舍人

中書舍人魏置中書通事舍人或曰舍人通事各為一

職

魏明帝時有
通事劉泰

晉江左乃合之謂之通事舍人武冠絳

朝服掌呈奏案章後省之而以中書侍郎一人直西省

即侍郎兼其職而掌其詔命宋初又置中書通事舍人

四員入直門內出宣詔命凡有陳奏皆舍人持入參決

於中自是則中書侍郎之任輕矣齊永平初中書通事

舍人四員各住一省時謂之四戶權傾天下

如法亮久為中書通

事舍人後出為大司農中書勢利之職法亮戀之垂涕而去又熒惑入太微太尉王儉謂武帝曰天文乖誤此

由四戶帝納之而不改

與給事中為一流梁用人殊重簡以才能

不限資地多以他官兼領後除通事字直曰中書舍人

專掌詔誥兼呈奏之事

裴子野以中書侍郎鴻臚卿掌
兼中書通事舍人別勅知詔誥

自是詔誥之任舍人專之

魏晉以來詔誥並
中書令及侍郎掌之說在中書令篇

陳置五人後魏有舍人省而不言其員北齊舍人省掌
署勅行下宣旨勞問領舍人十人後周有小史上士二
人此其任也屬春官隋內史舍人八員專掌詔誥煬帝
減四人後改為內書舍人唐初為內史舍人至武德三
年改為中書舍人置六員龍朔以後隨省改號而舍人
之名不易專掌詔誥侍從署勅宣旨勞問授納訴訟敷

奏文表分判省事自永淳以來天下文章道盛臺閣髦
彥無不以文章達故中書舍人為文士之極任朝廷之

盛選諸官莫比焉

按後漢章和以後尚書為機衡之任尚書郎含香握蘭直宿於建禮門太

官俱膳奏事明光殿下筆為詔誥出語為誥令曹公為
魏王置祕書令典尚書奏事則祕書之職近密尚書之
職疎遠魏文帝初改祕書為中書自後歷代相沿並管
樞密而後漢尚書郎非今之尚書郎乃中書舍人也武
太后臨朝天授元年壽春郡王盛器兄弟五人初出閣
同日受冊有司撰儀注忘載冊文及百僚在列方知闕
禮宰臣相顧失色中書舍人王敎立召小吏五人各令
執筆口授分寫同時須臾俱畢詞理典贍時人歎服景
龍四年六月二日初定內難唯中書舍人蘇頲在太極
殿後文詔填委動以萬計手操口對無毫釐差誤主書

韓禮談于陽轉書詔草屢謂題曰乞公少遲禮等書不
及恐手腕將廢故事舍人六員各押尚書省一行天下
衆務無不關決開元二年十一月紫微令姚崇奏紫微
舍人六員無一頭商量事諸舍人同押連署狀進說凡
事有是非理均與奪人心既異所見不同者望請別作
商量連狀同進若狀語交互恐煩聖思臣既是官長望
於兩狀復畧言二理優劣奏聽進止則人各盡能官無
留事勅曰可因是舍人唯知撰制不復分知機務既文
書填委遂令書錄委之堂後又其權勢傾動天下姚竟
因主書趙誨贓犯所累罷相姚誠多才而隳政擅權以
成斯弊
可哀也

宋初中書舍人為所遷官實不任職復置知制誥及直
舍人院故事入西閣皆中書詔試制誥三篇惟梁周翰

不名試而授其後楊億陳堯佐歐陽修亦如此例富弼
為知制誥封還劉從愿妻封遂國夫人詞頭唐制唯給
事中得封還詔書中書舍人繳詞自弼始元豐五年詔
中書舍人印為中書後省之印曾鞏陸佃並試中書舍
人自是始正官名遂以中書舍人判後省之事分案五
曰上案掌冊禮及朝會所行事曰下案掌受付文書曰
制誥案掌書記制詞及試吏校其功過曰諫官案掌受
諸司闕報文書曰記注案掌錄記注其雜務則隨所分

案掌之元祐初以蘇軾直舍人院有司言自官制行舍人院廢今為中書後省於是改為權中書舍人遂為故事後詔舍人各簽諸房文字其命詞則輪日分草中興置中書後省以中書舍人為長官六員常除二員一員領吏房及兵工房一員領吏房右選及禮刑房嘉泰四年李季章璧以宗正少卿權中書舍人而中字犯祖諱季章辭有旨權以直舍人院繫銜乃受命不知舍人院廢已久矣蓋大臣失於討論也紹興初詔中書門下兩

省已併為中書門下省其兩省合送給舍文字今後更不分送並送給事中中書舍人其後又詔以他官兼攝者稱權直資淺者為直舍人院

石林葉氏曰國初循唐舊制凡命官遷除磨勘移易差遣中書皆命詞給告不勝其繁元豐官制行始命階官職事官選人八品者給告無品官者但給黃牒而已元祐末猶以為多復命內外差遣及職事官本等內改易或再任者亦止給黃牒紹聖

中朱服為舍人以為監司郡守初除不給告禮太薄乃詔待制以上知州及帥臣監司初除再任並出告尚書侍郎兩省御史臺官外餘官并監司本等內改易者仍給黃牒後復行之不同元符初中書省復檢舉如前令

容齋洪氏隨筆曰中書舍人所承詞頭自唐至本朝皆只就省中起草付吏逮於告命之成皆未嘗越日故其職為難其以敏捷稱者如韋承慶下筆

輒成未嘗起草陸扆初無思慮揮翰如飛顏蕘草
制數十無妨談笑鄭畋動無滯思同僚閣筆劉敞
臨出局倚馬一揮九制皆見書於史策其遲鈍窘
擾者如陸餘慶至晚不能裁一言和嶢閉戶精思
徧討羣籍與夫斷憲舍人紫微失却張君房之類
蓋以必欲速成故也周廣順初中書舍人劉濤責
授少府少監分司西京坐遣男頊代草制詞也頊
時為監察御史亦責復州司戶自南渡以來典故

散失每除書之下先以省劄授之而續給告以是
遷延稽滯殿拂居官時纔還家即掩關謝客畏其
促詞命也先公使虜歸除徽猷閣直學士時劉才
邵當制日於漏舍囑之至先公出知饒州幾將一
月猶未受告其他倩諉朋舊俾之假手者多矣故
膺此選者不覺其難殊與昔異

通事舍人

昔堯試舜賓于四門蓋今任也秦置謁者漢因之掌儔

贊受事員七十人選孝廉年未五十威容嚴恪能儉贊

者為之

燕太子使荆軻劫始皇變起兩楹之間其後謁者持匕首刺腋漢高帝偃武修文故易之以版

有僕射冠高山冠

言其矜莊賓遠故以高山為號終軍為謁者使行郡國建節出東關關吏

識之曰此棄繻生

後漢謁者僕射為謁者臺主銅印青綬天

子出掌奉引

謁者僕射見尚書令對揖無敬謁者見執版拜

謁者三十人

漢官儀又

曰三十人

謁者初上官稱曰灌謁者滿歲稱給事

胡廣云灌者明

章二帝服勤園陵謁者灌栢後遂假茲名馬馬融曰灌者習所職也應奉曰高帝承秦禮儀多闕灌嬰服事七年號大謁者後人掌之以姓灌章列於漢書也雷義為灌謁者使持節督郡國行風俗太守令長留者凡七十

人
和帝代陳郡何熙為謁者僕射贊拜殿中音動左右

然則又掌唱贊

漢舊儀曰謁者缺選郎中黃鬚眉大音者以補之功次當選欲留增秩者許之

二漢隸光祿勲

後漢又有黎陽謁者光武以幽并兵騎定天下故於黎陽立營以謁者監之兵

騎千人復除甚重謁者任輕多放情態順帝改用府掾有清名威重者遷超牧守焉魏置僕射掌

大拜授及百官班次統謁者十人及晉武省僕射以謁

者并蘭臺江左復置僕射後又省宋武帝大明中復置

僕射一人職與魏同亦領謁者十人掌小拜授及百官

報章齊因之梁謁者臺僕射掌朝覲賓饗之事屬官謁

者十人掌奉詔出使拜假朝會賓贊功高者一人為假

史掌差次謁者陳亦有之後魏北齊謁者臺掌凡諸吉

凶公事導相禮儀僕射二人謁者三十人隋煬帝增置

謁者司隸二臺并御史為三臺謁者臺有大夫一人掌

受詔勞問出使慰撫持節策受及受冤枉而申奏之駕

出對御史引駕領議郎以下官

屬官有丞主簿錄事等

尋詔門下

內史御史司隸謁者五司監受表以為恒武不復專謁

者矣初魏置中書通事舍人官其後歷代皆有然非今

任隋初罷謁者仍置通事舍人十六員承旨宣傳開皇三年又增為二十四員及煬帝置謁者臺乃改通事舍人為謁者臺職謂之通事謁者置二十人又於建國門外置四方館以待四方使者隸鴻臚寺

煬帝置四方館東曰東夷使者

南曰南蠻使者西曰西戎使者北曰北狄使者各一人掌其方國互市事

唐廢謁者臺復以

其地為四方館改通事謁者為通事舍人掌通奏引納辭見承旨宣勞皆以善辭令者為之隸四方館而又屬

中書省

集賢殿

集賢殿書院唐開元中置漢魏以來祕書省有其職梁武帝於文德殿內列藏衆書北齊有文林館學士後周有麟趾殿學士皆掌著述隋平陳之後寫書正副二本藏於宮中煬帝於東都觀文殿東西廂貯書自漢延熹至隋唐皆祕書掌圖籍而禁中之書時或有焉初開元五年十一月於乾元殿東廊下寫四部書仍令祕書監馬懷素右散騎常侍褚無量總其事於麗正殿安置為

修書使至十二年學士張說等宴於集仙殿於是改殿
名集賢改修書使為集賢殿書院學士五品以上為學
士每以宰相為學士者知院事初燕國公張說為中書
令知院制以右常侍徐堅副之自爾常以近密官為副
兼判院直學士六品以下為之侍講學士開元初褚無
量馬懷素侍講禁中為侍讀其後康子元等為侍講學
士修撰官校理官司直學士

宋為集賢院大學士一人以宰相充學士以給監卿監

以上充直學士不常置修撰以朝官充直院校理以京官以上充皆無常員掌同昭文館凡昭文史館集賢謂之三館皆以兩省五品以上官一人判

史官

史官肇自黃帝有之自後顯者夏太史終古商太史高勢周則曰太史小史內史外史而諸侯之國亦置其官又春秋國語引周志及鄭書似當時記事各有其職秦有太史令胡毋敬至漢武始置太史公以司馬談為之

卒其子遷嗣卒後宣帝以其官為令行太史公文書其

修撰之職以他官領之於是太史之官唯知占候而已

自漢以前職在太史

直太史局

當王莽時改置柱下五史記

疏言行蓋效古動則左史書之言則右史書之自後漢

以後至於有隋中間唯魏明太和中史職隸中書其餘

悉多隸祕書唐武德初因隋舊制史官屬祕書省著作

局至貞觀三年間十二月移史館於門下省北宰相監

修自是著作局始罷史職及大明宮初成置史館於門

下省之南其修撰史事以他官兼領或卑品而有才者亦直焉開元二十五年宰臣李林甫監史以中書地切樞密記事者宜其附近史館諫議大夫尹愔遂奏移於中書省北其地本尚藥局內藥院

致堂胡氏曰古者史官世掌其職大臣不與天子不觀故得直筆取信於後世其次則如貞觀之制史官日隨仗入隨事記之猶為近古自李義府許敬宗不許史官聞仗後事以行其私姚璹乃建令

宰相撰時政記意欲迷眩千古令韋執誼又奏令
史官撰日歷日歷云者猶起草也將加是正而潤
色焉耳苟數人者誠無私意何用為是紛紛以其
請建之紛紛則其誣上行私之心欲蓋而益彰矣
夫天下有公是非不為言語文字可以變移白黑
淆亂忠邪故義府敬宗執誼之惡至於今不泯有
志於垂名竹帛者自修而已矣

宋制監修國史一人以宰相為之修撰直館檢討無常

員修撰以朝官充直館檢討以京官以上充掌修日歷

及典司圖籍之事凡國史別置院於宣徽北院之東以

藏之謂之編修院東京記云編修俗呼為史院天聖修

真宗史欲重其任降勅宰相為提舉參知政事樞密副

使為修史其同修史則以殿閣學士以上為之編修官

以三館祕閣校理以上及京官史畢即停

續會要

元豐改

官制日歷隸國史案每修前朝國史實錄則別置國史

實錄院以首相提舉翰林學士以上為修國史餘侍從

官為同修國史庶官為編修官實錄院提舉官如國史

從官為修撰除官為檢討

麟臺故事

元祐復置國史院隸門

下省明年又置國史院修撰兼知院事紹聖復以國史

院歸祕書省

宰輔三館題名

中興即祕書省復建史館以修神

宗哲宗兩朝實錄選本省官兼檢討校勘以侍從官充

修撰紹興五年又移史館於省之側別為一所以增重

其事至九年修徽宗實錄乃即史館開實錄院明年以

未修正史詔罷史館併為實錄院

紹興初實錄國史皆寓史館後罷史館過

修實錄即置實錄院遇修國史即置修國史院

著作局唯修纂日歷

中興會要

宰相

監修但提大綱檢討官搜閱校對惟修撰實專史職只

據所送到時政記

唐長壽中姚璩請仗下所言宰相撰錄號時政記自璩始五代以來中書

樞密院皆致時政記樞密院直學士編修太平興國八年蘇易簡為參政自是中書皆參政編錄唯呂蒙正嘗以宰相領其事端拱以後樞密院事皆送中書同修為一書及王欽若陳堯叟始乞別撰不關中書直送史館

起居注

事見左史門

銓次其事排以日月謂之日歷

聖朝職略

紹

興十八年詔置修國史院修神哲徽宗三朝正史又有

提舉修勅令天聖慶歷嘉祐熙寧編叙及元符勅令格

式各差宰臣提舉詳定官以侍從之通法令者充史館
又有校勘檢閱校正編校等官或以布衣之該洽者為
之

玉牒所提舉監修亦以宰相為之

見宗
正司

歐陽修論史館日歷奏臣伏以史者國家之典法也
自君臣善惡功過與其百事之廢置可以垂勸戒示
後世者皆得直書而不隱故自前世有國者莫不以
史職為重伏見國朝之史以宰相監修學士修撰又

有兩府之臣撰時政選三館之士當陞擢者乃命修起居注如此不為不重矣然近年以來員具而職廢其所撰述簡略遺漏百不存一至於事關大體者皆沒而不書此實史官之罪而臣之責也然其弊在於修撰之官惟據諸司供報而不敢書所見聞故也今時政記雖是兩府臣僚修纂然聖君言動有所宣諭臣下奏議事關得失者皆不紀錄惟書除目辭見之類至於起居注亦然與諸司供報文字無異修撰官

只據此銓次繫以日月謂之日歷而已是以朝廷之事史官雖欲書而不得書也自古人君皆不自閱史今撰述既成必錄本進呈則事有諱避史官雖欲書而又不敢書也加以日歷時政記起居注例皆承前積滯相因故纂錄常務追修累年前事而歲月既遠遺失莫存至於事在目今可以詳於見聞者又以追修積滯不暇及之若不革其弊則前後相因史官永無舉職之時使聖朝典法遂成廢墜臣竊見趙元昊

自初叛至復稱臣始終一宗事節皆不曾書亦聞修撰官甚欲紀述以纂修後時追求莫得故也其於他事又可知焉臣今欲乞特詔修時政記起居注之官並以德音宣諭臣下奏對之語書之其修撰官不得依前只據諸司供報編次除目辭見並須考驗事實其除某官者以某功如狄青等破儂智高文彥博破王則之類其貶某職者坐某罪如昨來麟州守將及并州龐籍緣白草平事近日孫沔所坐之類事有文

據及迹狀分明皆備書之所以使聖朝賞罰之典可
以勸善懲惡昭示後世若大臣用情朝廷賞罰不當
者亦得書以為警戒此國家置史之本意也至於他
大事並許史所據所聞見書之如聞見未詳者直牒
諸處會問及臣寮奏異同朝廷裁置處分並書之以
上事節並令修撰官逐時旋據所得錄為章卷標題
日分於史院躬親入櫃封鎖候諸司供報齊足修為
日歷仍乞每至歲終命監修宰相親至史院點檢修

撰官紀錄事迹內有不勤其事隳官失職者奏行責
罰其時政記起居注日歷等除今日以前積滯者不
往追修外截自今後並令次月供報如稍有遲滯許
修撰官自至中書樞密院催請其諸司供報拖延及
史院有所會問諸處不畫時報應致妨修纂者其當
行手分並許史院牒開封府勾追嚴斷其日歷時政
記起居注並乞更不進本所貴少修史職上存聖朝
典法此乃臣之職事不敢不言

容齋洪氏隨筆曰國朝熙寧以前祕書省無著作局故置史館設修撰直館之職元豐官制行有祕書官則其職歸於監少及著作郎佐矣而紹興中復置史館修撰檢討是與本省為二也宗正寺修玉牒官亦然官制既行其職歸於卿丞矣而紹興中復差侍從為修牒又以他官兼檢討是與本寺為二也然則今有戶部可別置三司有吏刑部可別置審官審刑院矣又玉牒舊制每十年一進謂

甲子歲進書則甲戌甲申歲復然今乃從建隆以來再行補修每及十年則一進以故不過三二年輒一行賞書局僭賞此最甚焉

建炎以來朝野雜記曰自真廟以來史館無專官神宗嘗欲付曾子固以五朝史事乃命為史館修撰使專典領其後子固所草具不當神宗意書不克成孝宗時修五朝史而列傳久未畢遂召李仁父洪景盧踵為之皆奉京朝不兼他職者數年而

史始畢蓋自開院至成書凡二十有八年秉筆者五十有餘人時景盧請通修九朝正史上許之景盧復言制作之事已經先正名臣之手是非褒貶皆有據依乞命後來史官無或輒將成書擅行刪改然書未就而景盧去國淳熙末修高宗實錄以他官兼之至紹熙末年而工未及半陳君舉直學士院建請以右文殿祕閣二修撰并舊史館校勘三等為史官自校勘供職稍遷祕閣修撰又遷右

文殿修撰在院三五年如有勞績就遷次對庶幾有專官之效無冷局之嫌然亦不克行明年但增檢討官三員限一年畢其後又七年而高錄始成時當修高宗正史孝宗光宗實錄朝論竟無專官始外召傅景仁陸務觀為在京官觀免奉朝請令修史於是務觀還政久矣乃落致仕以為同修國史兼實錄院同修撰焉

尚書省

昔堯試舜於大麓領錄天下事似其任也周之司會又

其職焉

鄭玄注周禮大司會若今尚書

秦時少府遣吏四人在殿中主

法書故謂之尚書尚猶主也漢承秦置及武帝游宴後庭始用宦者主中書以司馬遷為之中間遂罷其官以為中書之職至成帝建始四年罷中書宦者又置尚書五人一人為僕射四人分為四曹通掌圖書祕記章奏之事及封奏宣示內外而已其任猶輕至後漢則為優重出納王命敷奏萬機蓋政令之所由宣選舉之所由

定罪賞之所由正斯乃文昌天府衆務淵藪內外所折
衷遠近所稟仰故李固云陛下之有尚書猶天之有北
斗斗為天喉舌尚書亦為陛下喉舌斗斟酌元氣運平
四時尚書出納王命賦政四海

賦布也

令及左丞總領綱

紀無所不統僕射及右丞分掌廩假錢穀

隋志曰令統領之僕射副

令又與尚書分領諸曹

漢初尚書雖有曹名不以為號及靈帝以

侍中梁鵠為選部尚書於是始見曹名總謂之尚書臺

亦謂之中臺

吳諸葛恪既定山越孫權使尚書僕射薛綜勞軍曰故遣中臺近官迎致犒賜之

大事八座連名而有不合得建異議

自順帝永建元年初令三公尚書入

奏事其八座具

二漢皆屬少府

蔡質漢儀曰凡三公列卿將大夫五營校尉行

歷代尚書中

複道中遇尚書令僕射左右丞郎御史中丞侍御史皆引車先相迴避衛士傳不得避臺官臺官過乃得去至

晉宋以來尚書官上朝及下禁斷行人猶其制也

魏置中書省有監令遂掌機

衡之任而尚書之權漸減矣晉以後所掌略同八座丞

郎初拜並集都省交禮遷職又解交本漢制也至於晉

宋唯八座解交丞郎不復解交也

梁陸果遷尚書殿中曹郎拜曰八座丞郎

並到上省交禮而果至晚不及時刻坐免官

宋曰尚書寺居建禮門內亦曰

尚書省

令右闕則左僕射為省主

亦謂之內臺每八座以下入寺門

生隨入者各有差不得雜以人士凡尚書官大罪則免

小罪則遣出遣出者百日無代人聽還本職

宋顧琛為庫部郎以

顧碩寄尚書張茂度聞名而碩與同席坐琛坐此遣出又宋制曰今朝士詣三公尚書丞郎詣令僕射尚書丞

郎並門下下車履度門闕乃納履也

其令及二僕射出行分道之制與中

丞同令僕各給威儀十八人

說在御史大夫篇

自晉以後八座

及郎中多不奏事梁天監元年詔曰自禮闈陵替歷茲

永久郎署備員無取職事糠粃文案貴尚虛閑空有趨

墀之名了無握蘭之實曹郎可依昔奏事自是始奏事
矣又詔尚書中有疑事先於朝堂參議然後啟聞舊尚
書官不以為贈唯朱异卒特贈右僕射武帝寵之故也

考周捨問劉杳尚書官著紫荷相傳云挈囊竟何所出
答曰張安世傳云囊簪筆事武帝數十年注云囊索也
近臣簪筆
以待顧問自魏晉重中書之官居喉舌之任則尚書之

職稍以疎遠至梁陳舉國機要悉在中書獻納之任又
歸門下而尚書但聽命受事而已後魏天興元年置八
部大人於皇城四方四維面置一人以擬八座謂之八

國各有屬官分尚書三十六曹及諸外置令大夫主之

崔元伯通署三十六曹如令僕統事四年又復尚書三十六曹天賜元年

復罷尚書三十六曹別置武歸修勤二職分主省務武歸

比郎中修勤比令史至神嘉元年始置僕射左右丞及諸曹尚書

十餘人各居別寺舊例尚書簿諸曹須即出借蘭城王澄為尚書時公車署以理冤事奏請

宜案澄執奏以為尚書政本特宜遠慎故凡奏所事問道通之蓋以祕要之切防其宣露寧有古制所重今反輕之宜盡寫其事意以付公車詔從之北齊尚書省亦有錄令僕射總理

六尚書事謂之都督亦謂之北省後濟北王以太子監

國立大都督府與尚書省分理衆事仍開府置佐

顯祖特崇

此官以隨王守侍中攝大都督府長史

後周無尚書隋及唐皆有其制略

同凡尚書省事無不總龍朔二年改尚書省為中臺咸

亨初復舊光宅元年改為文昌臺垂拱元年又改為都

臺咸通初復舊長安三年又改為中臺神龍初復為尚

書省

亦謂之南省

都堂居中左右分司

舊尚書令有大廳當省之中今謂之都堂

都堂之東有吏部戶部禮部三行每行四司左司統之

都堂之西有兵部刑部工部三行每行四司右司統之

凡二十四司分曹共理而天下之事盡矣

故事叔父兄弟不許同省

為郎官格令不載亦無正勅貞觀二年十一月韋叔謹除刑部員外三年四月韋季武除主爵郎中其年七月韋叔諧除庫部郎中太宗謂曰知卿兄弟並在尚書省故授卿此官欲成一家之美無解稍屈階資其後同省者甚多近日非恩除拜即須相迴避當以准令同司曹判及公檢之官不得用大功以上親若制勅授者即申所司從早改擬遂

左右僕射各一人

總省事

左丞一人

掌轄

吏部戶部禮部

右丞一人

掌轄兵部刑部工部十二司事

左右司郎中各

一人員外郎各一人

各掌付左右丞所管諸司事

尚書六人

吏戶禮兵刑工

六部各侍郎九人

吏部戶部兵部各二人餘各一人

郎中二十八人

吏部

戶部兵部刑部各二人餘各一人并左右司則三十人

員外郎二十九人

吏戶兵刑四部

及司勳各二人餘司各一人并左右司共三十一人

都事六人

以下各有差

五代時尚

書都省在興國坊今梁太祖舊第

宋太平興國中徙於利仁坊孟昶舊第頗為宏麗中設

都堂左右司左右丞郎中員外郎廳東西廊分設尚書

侍郎廳事二郎中員外廳事六掌施行判命舉省內綱

紀程式受付六曹文書聽內外辭訴奏御史失職考百

官府之治以詔廢置賞罰曰吏部曰戶部曰禮部曰兵

部曰刑部曰工部皆隸焉凡天下之務六曹所不能與奪者總而決之應取裁者隨所隸送中書省樞密院事有成法則六曹准式具鈔令僕射丞檢察簽書送門下省畫聞審察吏部注擬文武官及封爵承襲賜勲定賞之事朝廷有疑事則集百官議其可否凡更改申明勅令格式一司條法則議定以奏覆太常考功諡議亦如之季終具賞罰勸懲事付進奏院頒行於天下大祭祀則誓戒執事官設官九尚書令左右僕射左右丞左右

司郎中員外郎各一人分房十曰吏房曰戶房曰禮房
曰兵房曰刑房曰工房各視其名而行六曹諸司所上
之事曰開拆房主受遣文書曰都知雜房主行進制勅
自班簿具員考察都事以下功過遷補曰催驅房主考
督文牘稽違曰制勅庫房主編檢勅令格式簡納架閣
文書紹聖二年詔在京官司所受傳宣內降隨事申尚
書省或樞密院覆奏又詔尚書都省彈奏六曹御史糾
不當者

石林葉氏曰元豐既新官制建尚書省於外而中
書門下省樞密學士院設於禁中規模極雄麗其
照壁屏下悉用重布不紙糊尚書省及六曹皆書
周官兩省及後省樞密學士院皆郭熙一手畫中
間甚有傑然可觀者而學士院畫春江曉景為尤
工後兩省除官未嘗足多有空閑處看守老卒以
其下有布往往竊毀盜取徐擇之為給事中時有
竊其半屏者欲付有司會竊處有刃痕議者以禁

廷經由株連所及多遂止然因是毀者寢多亦可惜也

錄尚書

漢武帝時左右曹諸吏分平尚書奏事知樞要者始領尚書事張安世以車騎將軍霍光以大將軍王鳳以大司馬師丹以左將軍並領尚書事

張安世領尚書事職典樞機以謹慎周密

自著每言大政已決輒移病出聞有詔命乃驚使吏之丞相府問焉每朝廷大臣莫知與議也又孔光字子夏領尚書凡典樞機十餘年守法度修政事不希苟合或問溫室省中樹皆何木也光答以他語其謹密如此

後漢章帝以太傅趙憙太尉牟融並錄尚書事尚書有錄名蓋自憙融始亦西京領尚書之任唐虞大麓之職也和帝時太尉鄧彪為太傅尚書事猶古冢宰總已之義薨輒罷之自魏晉以後亦公卿權重者為之職無不

總蜀蔣琬字公琰為錄尚書事晉宗室會稽王道子及世子元顯並錄尚書事時道子為東錄元顯為西錄晉康帝時何充讓錄表曰成康中分置三錄王導錄其一荀崧陸湛各錄二條事晉江右有四錄則四人參錄也江右張華江左庾亮並經關上書七條凡重號將軍刺史皆得命曹受用

唯不得施陳及加節宋孝武孝建中不欲威權外假省

錄大明末復置此後或置或省齊世錄尚書及尚書令

並總領尚書臺二十曹為內臺主行遇諸王以下皆禁

駐號為錄公

齊明帝為宣城王錄尚書廢帝昭業思蒸魚太官以無錄公命不與

高帝崩

遺詔以褚彥回錄尚書事江左以來無單為錄者有司

擬立優策王儉議宜有策書乃從之

王儉議以為見居本官別拜錄推理

應有策書而舊事不載中朝以來三公王侯則優策並設官品第一策而不優優者褒美策者兼明委寄尚書職居天官政化之本故尚書令品雖第三拜必有策錄尚書品秩不見而總任彌重前代多與本官同拜故不別有策即事緣情不容均之凡僚宜有策書用申重寄既異王侯不假優文從之

北齊錄尚書

一人位在令上掌與令同俱不糾察自隋而無

尚書令

秦置尚書令尚主也漢因之銅印青綬武帝用宦者更
為中書謁者令成帝去中書謁者令官更以士人為尚

書令

時弘恭石顯相繼為中書令專權邪僻前將軍蕭望之領尚書事建言以為尚書百官之本國家樞

機宜以通明公正處之武帝遊宴後庭故用宦者非古制也宜罷中書宦官

後漢眾務悉歸

尚書三公但受成事而已尚書令主贊奏事總領紀綱
無所不統與司隸校尉御史中丞朝會皆專席而坐京

師號曰三獨坐故公為令僕射者朝會不陞奏事天子

封禪則尚書令奉玉牒檢兼藏封之禮

後漢光武以僕霸為尚書令每

春帝下寬大之詔奉四時之命皆霸所建也郭伋遷尚書令處職機密數納忠諫陳忠為尚書令前後所奏悉條於南宮閣上以為故事鄭弘為尚書令亦著於南宮以為故事郭賀字喬卿為尚書令百姓歌之曰厥德仁明郭喬卿忠政朝廷上下平又左雄字伯豪為尚書令自雄在尚書令天下不敢謬選十餘年間稱為得人自雄掌納言多所正肅沈勲字異徵詣南宮賜酒拜尚書令持節臨辟雍名冠百僚荀彧字文若為尚書令居中持重焚毀故案奇策密謀不得盡聞又舉荀攸可以代已後攸為尚書令亦推賢進士魏武帝曰二荀令之論人久而益信沒世不忘

魏晉印綬與漢同冠進賢兩梁納言幘五

時朝服佩水蒼玉受拜則策命之以在端右故也薨於

朝堂發哀

陳矯字季弼為尚書令魏明帝卒至尚書門矯跪問曰陛下欲何之帝曰欲案行文書耳

矯曰此臣職分非陛下所宜臨也若臣不稱職則請就黜帝慙而迴又晉樂廣為尚書令無當時稱為後人所思又太熙元年詔曰夫總百揆之得失管王政之開塞者端右之職也是以自漢代以來慎選其人議郎王戎可為尚書令又衛瓘字伯玉拜尚書令性嚴憚以法御下視尚書若參佐尚書郎中掾屬又熊遠起曰伏見吏部以太尉荀組為尚書令復領荊州牧自三代以來未聞以納言之官而出領牧伯者王彪之字叔虎為尚書令與謝安共掌朝政安每稱曰朝之大魏晉以下任總事衆不能決者諮之王公無不立判

魏晉以下任總

機衡事無大小咸歸令僕

宋孝建元年詔曰尚書百官之元本庶績之樞機丞郎列

曹局司有任自須事無巨細悉歸令僕非所以詔能濟業也更可明體制責厥成也齊梁舊用左

僕射美遷司空

謝朓字敬仲徵為司徒尚書令朓辭脚疾不堪朝謁仍角巾自輿詣雲龍門謝

既見乘小車就席

梁陳並有之後魏北齊掌彈糾見事與御史

中丞更相廉察隋亦總領衆務唐尚書令朝服驚寃八

旒七章三梁冠武德初太宗為秦王時嘗居之其後人

臣莫敢當故自龍朔三年制廢尚書令

至廣德中郭子儀勲業既盛乃

特拜焉子儀以文皇帝故讓不敢受

令在唐為正二品朱梁置為正一品

宋淳化三年升在三師上掌佐天子議大政奉所出命

令而行之其屬有六曹凡庶務皆會而決之凡官府之紀綱程式無不總焉大事三省通議則同執政官合班小事尚書省獨議則同僕射丞分班輪奏若事由中書門下而有失當應奏者亦如之與三公三師侍中中書令俱以冊拜自建隆以來不除惟親王元佐元儼以使相兼領不與政政和二年詔尚書令太宗皇帝曾任今宰相之官已多不須置然是時說者以謂為令者唐太宗也熙陵未嘗任此蓋時相蔡京不學之過宣和七年

設復置令亦虛設而已

容齋隨筆論三省長官

見中書令門

僕射

僕射秦官漢因之自侍中尚書博士郎皆有之古者重

武官有主射以督課

古者重武官以僕射者掌事故曰僕射僕射者僕役於射也一云僕

主也軍屯吏騶宰永巷宮人皆有取其領事之號

凡此諸官皆有

僕射隨所領之事以號也若軍屯吏則曰軍屯僕射永巷則曰永巷僕射

成帝建始元年初

置尚書五人以一人為僕射主封門掌授廩假錢穀

鄭崇

字子游為尚書僕射數直諫諍每見
曳革履上笑曰我識鄭尚書履聲
後漢尚書僕射一

人署尚書事令不在則奏下衆事印綬與令同

自漢以下章服

並與令同獻帝建安四年以執金吾榮邵為左僕射衛臻為

右僕射侍者分置左右蓋自此始經魏至晉於江左省

置無恒置二則為左右僕射或不兩置但曰尚書僕射

令闕則左為省主若左右並闕則置尚書僕射以主左

事置祠部尚書以掌右事則尚書僕射祠部尚書不恒

置矣

若無令則左僕射為省主與令同若左右並闕則直置僕射在其中間總左右事

宋尚書

僕射勝右減左右居二者之間僕射職為執法置二則

為左右執又與尚書分領諸曹兼掌彈舉齊左右僕射

行則分道左僕射領殿中主客二曹

諸曹郊廟園陵車駕行幸明議臺內

非違文官舉補滿叙疾假事其諸吉慶瑞應衆賀災異

屢發衆變臨軒策命改號格制位官銓選凡諸除署論

功封爵貶出入議疑讞通關案

右僕射領祠部儀曹掌

則左僕射主右僕射次經之

曹庫藏穀帛文武廩給諸軍資差量人役百工死病亡

叛討捕考剔非違租布稅調理船車兵器其祠部郊廟

喪贈儀曹儀典禮學武官除署移非城邑人戶復除家

宅田地興工創架運寫物慮刑獄聽訟百工免遣通關

及案奏事則右僕射主左僕射次經之

黃案左僕射上署右僕射次署凡

僕射掌朝軌尚書掌獻奏都丞任在彈違

諸詳議事應須部議相值

者皆即先立意應奏黃案及闕事以立意官為議主凡辭訴有慢命者曹掾咨如舊若或命有咨則以其主意

者為議主齊梁舊制右僕射遷左僕射左僕射美遷令其僕

射處於中陳亦然後魏二僕射左居上右居下

今僕中丞騎唱

而入宮門至於馬道及郭秋為僕射以為非盡敬之宜乃奏請御在太極駒唱至止車門御在朝堂止司馬門駒唱不入宮自此始也又朱仲達為行臺僕射請准朝式在軍鳴駒廢帝笑而許之其肆情如此北齊

僕射職為執法置二則為左右僕射皆與令同左糾彈

而右不糾彈隋文帝開皇三年詔左右僕射從二品左

掌判吏部禮部兵部三尚書御史糾不當者兼糾彈之

右掌判都官度支工部三尚書又知用度餘並依舊

楊素

為右僕射與高頊專掌朝政後文帝漸疎忌素詔曰僕射國之宰輔不可躬親細務但三五日一度向省評論大事示崇重實奪其權也唐左右二僕射因前代本副終仁壽之末不復通省事

尚書令自尚書令廢闕二僕射則為宰相故太宗謂房玄齡杜如晦曰公為僕射當洞開耳目訪求才賢是謂宰相洪益之道今以決辭聽訟不暇豈助朕求賢之意乃令尚書細務悉委於兩丞其寬濫大故當奏聞者則

關於僕射及貞觀末除拜僕射必加同中書門下平章事及參知機務等名方為宰相不然則否然為僕射者亦無不加焉至開元以來則罕有加者自開元以來始有單為僕射不兼宰相者初龍朔二年改左右僕射為左右立政咸通元年

復舊官品第四

上元三年閏五月制中書省頒下諸州府並宜用黃紙

武太后改

二僕射為文昌左右相進階為從三品尋復本階神龍

初復為左右僕射

二年九月勅門下及都省宜別錄制勅自三月一進

開元元

年改為左右丞相從二品統理衆務舉持綱目總判省

事

二年四月勅在京有訴寃者並於尚書省陳牒所司為理若稽延致有屈滯者委左右丞及御史臺訪察

聞奏如未經尚書省不得輒於三司越訴

御史糾不當者兼得彈之至天寶

元年復舊

議曰按僕射秦官其任則微其職甚細東漢以後雖委任漸重職司會府而非百寮師長之職也又按丞相亦秦官秦氏每羣臣上表皆云丞相臣某為首漢之宗臣蕭何為丞相漢儀丞相進天子御座為起在輿為下有疾法駕至第問得戮二千石申屠嘉欲斬

內史鼂錯是也霍光受顧託之重當伊周之地廢昌
邑王上表太后丞相臣敞為首大司馬大將軍臣光
次之其尊崇如此中間嘗置左右丞相亦嘗改為相
國亦為大司徒大抵漢之丞相是為三公於天下無
所不統後漢亦以三公為宰相則司徒本西漢丞相
也後或為丞相或為相國或為大丞相雖互為之名
其實一也曹公司馬師昭趙王倫王敦王導劉義宣
齊高帝梁武帝爾朱榮侯景陳武帝齊獻武隋文帝

皆為之歷代多非尋常人臣之職亦為贈官然自秦以降實居百寮之長今尚書令總領衆務舉持綱目僕射貳之誠為崇重且非統國政宰天下之任宜侍中中書令如直以尊崇則太師不然上公太尉始可師長命百僚也龍朔中天寶初嘗改侍中中書令為左右相遠協伊尹仲虺為左右相周公召公相成王為左右之義斯誠允當或為尚書令僕射錄尚書之職是官之師長按前代錄尚書霍光張安世王鳳趙

憲牟融鄧彪張禹李固王導褚彥回齊明帝之徒或
是丞相或是三公或是大將軍大司馬兼之皆秉朝
政猶古冢宰百官總已實宰輔也其時別自有令僕
今僕射雖嘗改為丞相名同而職異品秩又未崇極
上有三師三公尚書令七人豈得比前代丞相受任
也其襲舊名無實者若今刺史皆云使持節按前代
使持節得戮二千石其王公以下封國皆南面臣人
分茅建社其開府儀同三司則禮數班秩皆如三公

置府辟吏今豈有其實乎此例甚衆不能遍舉安有僕射因改丞相之名都無丞相之實而為百僚師長也又與丞郎絕禮若不隔品致敬則諸司長官與隔品寮屬其可絕禮乎斯不然矣

宋制左右僕射掌佐天子議大政貳令之職與三省長官皆為宰相之任元豐官制行不置侍中中書令以左僕射兼門下侍郎右僕射兼中書侍郎行侍中中書令職事寄祿為特進政和中詔曰昔神考訓迪厥官有司

不能奉承仰惟前代以僕臣之賤充宰相之任可改左僕射為太宰右僕射為少宰靖康元年詔依制復為僕射乾道八年詔左右僕射依漢制改為左右丞相

左右丞

秦置尚書丞一人屬少府漢因之至成帝建始四年置丞四人及後漢光武始減其二唯置左右丞佐令僕之事臺中紀綱無所不統左丞主吏民章服及騶伯史

黃香

宇文彊部左丞功滿當遷和帝留增秩後部尚書遷僕射

右丞與僕射皆掌授廩假

錢穀又假署印綬及紙筆墨諸財用庫藏

楊喬為右丞
行值太常辛

柔柔不避車喬奏
柔不敬下廷尉

左右丞闕以次夕郎補之三歲為刺

史漢御史中丞侍御史行複道中遇尚書及丞郎避車

執板揖丞郎坐車舉手禮之車過遠乃去尚書言左丞

敢告知如詔書律令郎見左右丞對揖無敬稱曰左右

君丞郎見尚書執板揖稱曰明侍郎見令僕執板揖稱

曰對揖魏晉左右丞銅印青黑綬進賢一梁冠介幘絳

朝服左丞主臺內禁令寢廟祠祀朝儀禮制選用置吏

急假兼糾彈之事

傳咸谷辛曠詩序曰尚書左丞彈八座以下居萬機之會乃皇朝之司直

天臺之管轄又都詵為左丞奏推吏部尚書崔洪洪曰我舉却丞而還奏我此挽弓自射之謂右丞掌

臺內庫藏廬舍凡諸器用之物及刑獄兵器督錄遠道

文書章表奏事宋因之而右丞亦主錢穀

虞玩之字茂瑤宋元徽中

為右丞齊高帝參政與玩之書曰今漕藏有關吾賢居右丞已覺金粟可積矣

皆銅印黃綬齊

左右丞寢廟郊祀吉慶瑞應災異立作格制諸案彈用

除置吏補滿除遣

任遐為右丞奏御史中丞陸澄不糾事請免其官

視中書郎

遷黃門郎左丞掌兵士百工補役死叛考代年老疾病

解遣其內外諸庫藏穀帛刑刻創架爭訟田地船乘兵

工死叛考剔討捕差分百役兵器諸營署人領州郡租

布民戶移徙州郡縣併帖城邑人戶割屬刺史二千石

令長丞尉被收及免贈文武諸犯削官事白案則右丞

上署左丞次署黃案則左丞上署右丞次署諸立格制

及詳讞大事郊廟朝廷儀體亦左丞上署右丞次署梁

皆銅印黃綬一梁冠左丞掌臺內分職儀禁令報人章

督錄近道文書章表奏事糾諸不法凡諸尚書文詣中

書省者密事皆以契刀囊盛之封以丞相印

劉洽字義璫為左丞

準繩不避貴戚尚書省賄賂莫敢通

右丞掌臺內藏及廬舍凡諸器用之

物錄遠道文書章表之事陳因之後魏北齊左丞為上

階右丞為下階北齊左丞掌吏部等十七曹

吏部考功主爵殿中

儀曹三公祠部主客左右中兵左右外兵都官二千石度支左右戶

并糾彈見事又主管

轄臺中違失並糾駁之

崔昂除左丞兼度支尚書左丞兼尚書近代未有唯昂為冠首

朝野榮之右丞掌駕部等十一曹

駕部虞曹屯田起部兵部比部水部膳部倉部金部

庫部亦管轄臺中唯不彈糾餘悉與左同隋左右丞掌分

尚書諸司糾駁

元壽字長壽為尚書左丞蕭摩訶妻患將死奏令其子向江南收家產壽奏劾

之曰摩訶遠念資財近忘匹好令其子捨危懼之母為聚斂之行御史韓微之等見而不彈請付大理臣忝居

左轄無容寢默

唐因隋制龍朔二年改為左右肅機咸通元年

復舊左丞掌管轄諸司糾正省內勾吏部戶部禮部等

十二司通判都省事右丞掌管兵部刑部工部等十二

司餘與左丞同

宋制左右丞掌參議大政通治省事以貳令僕射之職僕射輪日當筆遇假故則以丞權當筆知印大祭祀酌

獻薦饌進熟則受爵酒以授僕射舊班六曹尚書下官制行升其秩為執政官元豐五年五月詔左右僕射丞合治省事是月御史言左右丞蒲宗孟王安禮於都堂下馬違法犯分安禮爭論帝前以謂今左右丞為執政官不應又有厚薄左右丞於都堂上下馬自此始元祐元年詔本旨應受御札事大者送中書省取旨事小急速止本省行訖奏知仍關報中書門下其未便者聽執奏又六曹擬鈔左右丞簽書僕射書檢又事有條例不

至大者六曹長官專決非六曹所能決者申省常程及

訟牒止付左右丞

初藝祖既因唐制置宰相復用翰林學士陶穀之言命薛居正沈義倫為

參知政事以為宰相趙普之貳官制行罷參知政事以門下中書侍郎尚書左右丞為執政時章惇以前參知政事除門下侍郎張璪以參知政事除中書侍郎蒲宗孟王安禮自翰林學士除尚書左右丞云

元豐

寄祿為光祿大夫建炎三年詔中書門下二侍郎並復改為參知政事廢尚書左右丞

左右司郎中

員外郎

隋煬帝三年於尚書都省初置左右司郎二人品同諸

曹郎從五品掌都省之職唐貞觀二年改為郎中龍朔二年改為左成務咸通元年復舊令掌副左右丞所管諸司事省置鈔目勘稽失知省內宿直判都省事若右司不在則左併行之左司不在右亦如之員外郎武后永昌元年置與郎中分掌曹務神龍元年省二年復置宋制左司郎中右司郎中左司員外郎右司員外郎各一人掌受付六曹之事而舉正文書之稽失分治省事左司治吏戶禮奏鈔班簿房右司治兵刑工案鈔房而

開拆制勅御史

元豐六年都司置御史房主行彈糾御史案察失職

催驅封椿印


房則通治之有稽滯則以期限舉催初於都司置吏設案而議者謂臺郎宰掾不當自為官司遂隨省房分治所領之事惟置守分書奏各四人主行校定省吏都事以下功過及遷補之事元豐元年都司御史房置簿以書御史六曹官糾劾之多寡當否為殿最歲終取旨陞黜紹聖元年詔諸司以歲終點檢六曹稽違最多者具郎官姓名上省取旨二年詔御史臺察六曹稽緩違失

者送左司籍記宣和二年左司員外郎王蕃奏都司以
彌綸省闥為職事無不預今宰丞入省諸房文字填委
次第呈覆自朝至於日中或昏暮僅絕其勢不暇一一
檢閱細故而省吏往稟宰丞請筆以草檢令承從官齎
赴郎官廳落日押字謂宜遵守元豐及崇寧舊法諸房
各具簽貼先都事次點檢次郎官押訖赴宰臣請肇行
下於是詔曰先帝肇正三省詔給今都司以贊省務今
都司寔以曠官緣省吏强悍敢肆侵侮自今違法事其

左右司官勿書其事舉劾情重者竄責元豐寄祿為朝
議大夫



文獻通考卷五十一



總校官庶吉士臣張能照

校對官檢討臣郭寅

謄錄監生臣馬嗣全

欽定四庫全書叢要

史部

文獻通考卷五十二

詳校官員外郎臣潘紹觀



欽定四庫全書薈要卷九千三百七十二

史部

文獻通考卷五十二

鄱陽馬端臨貴與著

職官考六

歷代尚書 八座附

秦尚書四人 不分曹名 漢成帝初置尚書五人其一人為僕

射四人分為四曹 尚書曹名自此而有 常侍曹 主公卿 二千石曹 主郡

國二民曹 主凡吏民上書以人字改 客曹 主外國夷狄 後又

置三公曹

主斷獄

是為五曹後漢尚書五曹六人其三公

曹尚書二人

掌天下歲盡集課州郡

吏曹

掌選舉齊祠後漢志謂之常侍曹亦謂之選部

二千石曹

掌中都官水火盜賊辭訟罪法亦謂之賊曹

民曹

掌繕理功作鹽池苑囿

客

曹

掌羌胡賀法駕出則護駕後漢光武分二千石曹及客曹為南主客北主客二曹

兩梁冠納

言幘或說有六曹

按後志云分客曹為二是六天曹也又晉志云以前漢五曹更加中都官

曹為六曹也按應劭漢官云二千石主中都官事則不應更有中都官曹也今依劭說為五曹六人魏朗字叔

英又為尚書再升紫微審諤禁省為百僚所服又張陵字處仲為尚書歲朝梁冀帶劍入省陵叱令奪劍劾冀

詔以歲俸贖罪又鄭均字仲虞為尚書淡泊無為以病罷還第賜尚書祿號為白衣尚書魏有吏部

左民客曹五兵度支凡五尚書晉初有吏部三公客曹

駕部屯田度支六曹

無五兵

太康有吏部殿中五兵田曹

度支左民為六曹尚書

無駕部三公客曹

及渡江有吏部祠部

五兵左民度支五尚書

皆銅印黑綬進賢兩梁冠納言幘絳朝服佩水蒼玉乘軺車早

輪執笏負荷加侍官者武冠左貂金蟬

宋有吏部祠部度支左民

左民尚書統右

民及駕部二曹都官五兵六尚書

尚書納言幘進賢兩梁冠佩水蒼玉

齊梁與宋

同

侯景改梁五兵為七兵尚書又職官錄曰齊尚書品服悉與今同

亦別有起部而不

常置也陳與梁同後魏初有殿中

掌殿內兵馬倉庫

樂部

掌伎樂及

角使掌牛馬駕部驢騾

南部掌南邊州郡

北部掌北邊州郡

五尚書其

後亦有吏部

初曰選部

兵部都官度支七兵祠部民曹等尚

書又有金部庫部虞曹儀曹右民宰官

元禎為宰官尚書

都牧

元禎為都牧尚書

牧曹右曹太倉太官祈曹神都儀同曹等尚

書

自金部以下但有尚書之名而不詳職事

北齊有吏部殿中

殿中統殿中曹主駕行百

官留守名帳宮殿禁衛及儀曹三公駕部四曹

祠部五兵都官度支六尚書後

周無尚書隋有吏禮兵刑戶工六部尚書唐尚書與隋

同

龍朔二年改尚書為太常伯咸通初復舊

歷代吏部尚書及侍郎品秩悉

高於諸曹

八座後漢以六曹尚書并令僕二人謂之八座魏以五

曹尚書二僕射一令為八座宋齊八座與魏同

晉梁陳不言八

座之數

隋以六尚書左右僕射及令為八座唐與隋同

凡歷

代尚書有五曹則兼以二僕射一令為八座有六曹則以左右僕射為一座兼令共為八座若有六曹而左右僕射並闕則以尚書僕射及令為八座若尚書唯有五曹又無左右僕射則不備矣

宋制判省事一人以諸司三品以上充總轄二十四司

及集議定諡文武官封贈注甲發付選人出雪投狀之

事令史三人驅使官三人散官一人

至和中宣徽南院使吳育言國家總

覽萬機唯在綱要小大之務各有攸司若朝廷職舉而事簡則坐制天下不勞而治矣今尚書都省是其本也自唐末五代因循苟且雜置他局事無本末不相維持使天子之大有司廢為閑所凡細瑣之務動干朝廷遂至君相焦勞日不暇給如百川浩蕩而不治其本源萬目開張而不得其綱領雖欲盡力其勢莫可以正也臣前判尚書都省見其官司局次燦然具存其如有大論議當下衆官雜定以質所長而久廢不舉今惟定諡時一會都堂是存其小而廢其大者深足惜也竊謂久廢之職豈能一人盡正其名謂當隨宜講舊而漸復之且於諸學士中分命知六行尚書事其舍人待制大兩省官即知左右丞郎中員外事其餘館職或有名望朝士即知郎中員外事仍於舊相或前任兩府重臣中除一兩人判都省然後各使檢詳典故度其可行者奏復之

其次諸司寺監從而舉之至於金穀之計見屬三司者亦無相妨並且依舊事不驚俗體皆有宜歲年之間此制一定有所責成則高拱無為之治可以馴致矣論者嘉之然以因襲既久難於驟革其論卒不行

容齋洪氏隨筆曰祖宗朝曾為執政其後入朝為他官者甚多自元豐改官制後但為尚書曾孝寬自簽書樞密去位復拜吏部尚書韓忠彥自知樞密院出藩以吏書召李清臣蒲宗孟王存皆嘗為左丞而清臣存復拜吏書宗孟兵書先是元祐六年清臣除目下為給事中范祖禹封還朝廷未決

繼又進擬宗孟兵部右丞蘇轍言不如且止左僕射呂大防於簾前奏諸部久闕尚書見在人皆資淺未可用又不可闕官須至用前執政轍曰尚書闕官已數年何嘗闕事遂已胡宗愈嘗為右丞召拜禮書吏書自崇寧以來乃不復然

岳氏愧郊錄曰今世為尚書者尚字皆從平聲都省之名亦然珂嘗竊疑其義所未解考之宋書百官志而後知其訛志之言曰尚書古官也舜攝

帝位命龍作納言即其任也周官司會鄭玄云若
今尚書矣秦世少府遣吏四人在殿中主發書故
謂之尚書尚猶主也漢初有尚冠尚衣尚食尚浴
尚席尚書謂之六尚戰國時已有尚衣尚冠之屬
矣秦時有尚書令尚書僕射尚書丞然則尚書之
稱尚書從去聲而非平聲亦既明甚第鄭康成注
周禮司會曰司會周官之長若今尚書唐陸德明
釋其音曰常雖有此据了不知其義之所由取此

殆今世襲稱之始也徽宗朝復殿中省有六尚今
內官省品秩猶有尚官等稱謂益無可疑云

歷代郎官

郎官謂之尚書郎漢置四人分掌尚書事一人主匈奴
單于營部一人主羌夷吏民一人主戶口墾田一人主
財帛委輸後漢尚書侍郎三十六人

後漢志曰尚書六
曹侍郎三十六人

一曹六
人也

主作文書草取孝廉年未五十先試箋奏選有

吏能者為之從三署諸臺試初上臺稱守尚書郎中滿

歲稱尚書郎三歲稱侍郎五歲遷大縣其遷為縣令縣令秩滿自占縣詔書賜錢三萬與三臺租錢餘官則否吏部典劇多超遷者鄭弘為僕射奏以臺職任尊而賞薄人無樂者諸吏郎補二千石自此始也八座受成事

決於郎下筆為詔策出言為詔命

後漢尚書陳忠上疏曰尚書出納帝命為

王喉舌之官臣等既愚闇諸郎多文俗吏鮮有雅才每為詔文宣示內外轉相求請

其入直官供

青縑白綾被或以錦縹為之

縹私列反縹繫也

給帳帷茵褥通

中枕太官供食物湯官供餅餌及五熟果實之屬五日

一美食下天子一等給尚書郎侍使一人女侍使二人
皆選端正妖麗執香爐香囊護衣服奏事明光殿省省
中皆以胡粉塗壁畫古賢烈女以丹朱漆地故謂之丹
墀尚書郎口含雞舌香以其奏事荅對欲使氣息芬芳
也奏事則與黃門侍郎對揖黃門侍郎稱已聞乃出丞
郎月賜赤管大筆一雙隃麋墨一笏

馮豹為尚書郎每奏事未報常俯伏

省閣下或從昏至明天子默使持被覆之不驚也日暮諸郎下豹每獨在後帝嘉之隃麋今汧陽縣出墨魏

自黃初改祕書為中書置通事郎掌詔草

即今中書舍人之任而

尚書郎有二十三人

有殿中吏部駕部金部虞曹比部南主客祠部度支部農部水部

儀曹三公倉部民曹二千石中兵外兵別兵都兵考功定課

非復漢時職任青龍二

年尚書令陳矯奏置都官騎兵合凡二十五郎每一郎

缺自試諸孝廉能給文案者五人謹封奏其姓名以補

之

魏韓宣為尚書郎常以職事當受罰已背縛束杖未行文帝輦過聞而赦之

晉尚書郎選

極清美號為大臣之副武帝時有三十四曹

加魏直事屯田起部

左士右士其民曹中兵外兵分為左右主客又分為左右南北無農部定課考功凡三十四曹

後又置

運曹為三十五曹置郎中二十三人更相統攝

晉魏舒為尚書

郎時欲沙汰郎官非其才者罷之舒曰吾即其人也襍被而出同僚無清論者咸有愧色或為三十

六曹當五王之難其都官中騎三曹郎畫出督戰夜還

理事東晉有十五曹

殿中祠部吏部儀曹三公比部金部度支都官左民騎部倉部庫部

中兵自過江之後官資少減

王坦之選曹將擬為尚書郎坦之聞曰自過江尚書

郎正用第二人何得以此見擬其子國寶好傾側婦父謝安惡之除尚書郎國寶以為中興膏腴之族唯作吏部不作餘曹郎辭不拜又宋江智淵改尚書庫部郎時高流官序不為臺郎智淵門孤援寡此選意不悅固辭不拜梁王筠除尚書殿中郎王氏過江以來未有居郎署者或勸不就筠曰陸平原東南之秀王文度獨步江東吾得此蹤昔人何桓玄僭位改都官郎為賊曹宋高

所多恨乃忻然就職

祖時有十九曹元嘉以後有二十曹郎三公比部主法

制度支主算都官主軍事刑獄其餘曹所掌各如其名

宋武帝初加置騎兵主客起部水部四曹并東晉舊十五曹合為十九曹元嘉十八年增刪定曹郎即魏世之定科郎也三十年又置功論齊依元嘉制其拜吏部郎郎後又省騎兵故為二十曹

亦有表讓之禮

齊謝朓遷尚書吏部郎上表三讓中書疑朓官未及讓以問沈約約曰宋元嘉

中范曄讓吏部朱循之讓黃門蔡興宗讓中書並三表詔答其事宛然近代小官不讓遂成常俗恐此有乖讓意王藍田劉安西並貴重初自不讓今豈可慕此不讓邪孫興公孔頴並讓記室今豈可三署皆讓邪謝吏部今授超階讓別有意

豈闕官之大小邪

梁加三曹為二十三曹

殿中虞曹屯田其

郎中舊用員外郎正主簿正佐有才地者為之遷通直

郎天監三年復置侍郎視通直郎郎中遷為之

梁到洽為尚書

殿中郎洽兄弟羣從遞居此職時人榮之又殿中郎缺武帝曰此曹舊用文學且居鴈行之首宜詳擇其人乃以張緬陳有二十一曹後魏三十六曹至西魏改為十

二部北齊有二十八曹

吏部考功主爵殿中儀曹三公祠部駕部主客虞曹屯田起部

左中兵右中兵左外兵右外兵都兵都官二千石比部水部膳部度支倉部左民右民金部庫部

其吏

部三公各二人餘並一人凡三十郎中

後魏北齊唯置郎中隋初

尚書有六曹二十四司凡領三十六侍郎

吏部司勳主客膳部兵部

職方都官司門度支戶部比部刑部等侍郎各二人主
爵考功禮部祠部駕部庫部金部倉部工部屯田虞部
水部侍郎
各一人
分司官曹務直禁省如漢之制至開皇三年

二十四司又各置員外郎一人以司其曹之籍帳侍郎

闕則攝其曹事

今尚書員外郎其置自此始以前歷代皆謂之尚書郎各以曹名為稱首或謂

之侍郎皆無員外之號前代史傳及職官要錄或有言員外郎者蓋謂員外散騎侍郎耳非尚書之職前代所言郎官上應列宿蓋謂三署郎非今所謂尚書郎中也煬帝即位以尚書六曹各

置侍郎一人以貳尚書之職

今之侍郎其置自此始也或有曹加二人者夫侍郎

之名舊矣漢凡諸郎皆掌更直執戟宿衛諸殿門以侍衛之故通謂之侍郎故武帝時東方朔為郎當時謂之

官不過侍郎位不過執戟是也歷代尚書亦有侍郎隋初尚書諸曹二十四司諸郎皆謂之侍郎通若今之郎官耳非今六部侍郎之任

改諸司侍郎但曰郎

則今郎中之職

又改吏部為選部郎禮部為儀部郎兵部為兵曹郎刑部為憲曹郎工部為起曹郎以異六侍郎之名廢諸司員外郎而每司增置一曹郎各為二員都司置左右司郎中各一人品同諸曹郎掌都省之職尋又每減一郎置承務郎一人同開皇員外郎之職唐改隋諸司郎為郎中每曹又復置員外郎武德六年廢六司侍郎貞觀

二年復舊今尚書省有左右司郎中各一人分掌尚書
六曹事其諸曹諸司郎中總三十人員外郎總三十一
人通謂之郎中尤重其選其職任名數各列在六曹之
後凡郎中章服皆玄冕五旒衣無章裳刺黻一章兩梁
冠凡員外郎章服並爵弁玄纓簪尊者衣纁裳一梁冠

行臺省

行臺自魏晉有之昔魏末晉文帝討諸葛誕散騎常侍
裴秀尚書僕射陳泰黃門侍郎鍾會等以行臺從至晉

永嘉四年東海王越帥衆許昌以行臺自隨是也

越討石

勅表以行臺隨軍

及後魏謂之尚書大行臺別置官屬

後魏道武帝置

中山行臺以秦王儀為尚書令以鎮之孝文永熙三年以宇文泰為大行臺以蘇綽為行臺度支尚書

北

齊行臺兼統民事自辛術始焉

武定八年辛術為東南道行臺東徐州刺史郭

志殺郡守文宣聞之敕術曰江淮初附百姓難向京師留卿為行臺亦欲理邊民寃枉監理牧守自今以後所統十餘州地諸有犯法者刺史先啟聽報以下先理後表齊代行臺兼總民事自術始也

其官置令

僕射其尚書丞郎皆隨時權制

江左無行臺唯梁末以侯景為河南王大行臺

承制如鄧禹故事

隋謂之行臺省有尚書令僕射

左右任置

各一人

主事四人有考功

兼吏部主
爵司勳

禮部

兼祠部
主客

膳部兵部

兼職

方駕部庫部刑部

兼都官
司門

度支

兼倉
部

金部工部屯田

兼水

部虞

侍郎各一人每行臺置食貨農圃武器百工監副

各置丞

食貨四人農圃一人
武器二人百工四人

錄事等員

食貨農圃百工
等各二人武器

一蓋隨其所管之道置於外州以行尚書事開皇八年

將伐陳則置淮南行省於壽春九年已平陳則廢淮南

行臺省唐初亦置行臺武德四年詔陝東道大行臺尚

書省自令僕至郎中主事品秩皆與京師同而員數差

少山東行臺及總管諸州並隸焉其益州襄州山東淮南河北等道令僕以下各降京師一等員數又減焉行臺尚書令得承制補其秦王齊王府官之外各置左右六護軍府及左右親事帳內府貞觀以後廢其後諸道各置採訪等使每使有判官二人兼判尚書六行事亦行臺之遺制

致堂胡氏曰由朝廷制藩屏以藩屏臨州縣以州縣治百姓如挈裘而振其領政出於一則稟承者

無二三之惑今唐全有四海置郵以傳命雖萬里之遠不逾時月而至矣而建二三行臺於外使大臣承制補置是政出於朝廷又出於行臺夫豈國無異政之體哉

按行臺省之名雖始於魏晉之間然兩漢初興高祖所以委蕭何世祖所以命鄧禹其權任蓋亦類此唐天寶以後以盜賊陷兩京夷狄侵畿甸則或以大元帥副元帥命親王勲臣為之然但可任專

征之責而他事則稟朝旨則亦未嘗備行臺省之事也至其末年方鎮擅地請節於是或以侍中中書令同平章事王爵命之如錢鏐馬殷王審知之徒蓋名為奉正朔而實自為一朝廷矣然則行臺省之名苟非創造之初土宇未一以此任帷幄腹心之臣則必衰微之後法制已隳以此處分裂割據之輩至若承平之時則不宜有此名也建炎時張魏公以樞密使宣撫川陝趙忠簡謂之曰元樞

新立大功出當川陝半天下之責自兵事外悉當
奏稟蓋大臣在外忌權太重也及魏公得罪謫詞
言假便宜行事之制忘人臣無將之嫌宵內閣以
招賢擬尚方而鑄印然則承制之事易以惹謗忠
簡之言固篤論也

吏部尚書

侍郎

郎中

員外郎

司封郎中

員外郎

司勳郎中

員外郎

考功

郎中

員外郎

官誥院附

周禮天官太宰掌建邦之六典以佐王理邦國

變冢言
太者進

退異名也百官總焉則謂之冢宰列職於王則謂之太宰宰主也建立也邦理王所居之邦國佐猶助也周公居攝而作六典之職以佐王理邦國漢成帝初分尚書置四曹蓋因事設員以司其務非擬於古制也至光武乃分為六曹迄於魏晉或五或六亦隨宜施制無有常典自宋齊以來多定為六曹稍似周禮至隋六部其制益明唐武太后遂以吏部為天官戶部為地官禮部為春官兵部為夏官刑部為秋官工部為冬官以承周六官之制若參詳古今徵考職任則天官太宰當為尚書令非吏部之任今吏部之始宜出於夏官之司士云

又夏官之屬有司士下大夫二人掌羣臣之版

古書版為班班

書或為版版名籍也

歲登下其損益之數

謂用功過黜陟者

辨其年歲與

其貴賤

年數多少知其老少

周知邦國都家縣鄙之數卿大夫士

庶子之數以詔王理

告王所以當進退

以德詔爵

有賢者之德乃詔以爵

以

功詔祿

理有功勲後告以祿

以能詔事以久奠食

能者事成乃食之王制曰論定

然後官之任官然後爵之位定然後祿之奠音定

漢成帝初置尚書有常侍曹

主公卿事後漢改為吏曹主選舉祠祀後又為選部

靈帝

以梁鵠為選部尚書

魏改選部為吏部主選事

陳羣為尚書延康元年羣始建九品

官人之法拜吏部尚書

晉與魏同

山濤為吏部尚書用人皆先密啟然後公奏舉無遺才凡所題

目終始如其言唯用陸亮尋以賄敗啟事曰臣欲以都生為溫令詔可尋又啟曰訪聞詵喪母不時葬遂於所居屋後假葬有異同之議請更選之詔曰君為管人倫之職此輩應為清議與不便當裁處之劉聰僭號省吏

部置左右選曹石勒時又置左右執法郎典定士族副選舉之任

宋時吏部尚書領吏

部刪定三公比部四曹考武不欲威權在下大明二年

分吏部尚書置二人以輕其任而省五兵後還置一吏

部尚書順帝昇明元年又置五兵二尚書晉宋以來吏

部尚書資位尤重

蔡廓為吏部尚書曰我不能為徐羨之署紙尾遂不就選按黃紙錄事尚

書與吏部連名故云署紙尾

梁陳亦然後魏北齊吏部統吏部

掌褒崇選

補考功主爵三曹

自洛陽遷鄴已後掌大選知名者數四文襄帝少年高明所蔽也疎袁淑

德沈密謹厚所傷者細楊惛風流輒給取士失於浮華唯辛術為尚書性尚貞明擢士以才以器循名責實新

舊參舉管庫必擢門閥不遺前後
銓衡術最為折衷甚為當時所稱
後周有吏部中大夫

一人

掌羣臣及諸子之簿辨其貴賤與其年歲歲登下其損益之數依六勲之賞領祿之差

小吏

部下大夫一人

掌貳吏部之事

領司勲上士等官屬大司馬隋

吏部統吏部主爵司勲考功四曹

牛弘為吏部尚書其選舉先德行而後文

才所進用多稱職吏部侍郎高孝基鑒賞機悟清慎絕倫然爽俊有餘迹似輕薄時宰多以此疑之唯弘深識其真推心委任隋之選舉於斯為最自後周以降選無清濁及盧愷攝吏部與薛道衡陸彥師等甄別士流故

涉黨同之譖

唐龍朔二年改吏部尚書為司列太常伯咸亨

初復舊光宅元年改吏部為天官神龍元年復舊天寶

十一載改為文部

至德初復舊

掌文官選舉總判吏部司封

司勲考功四曹事舊令班在侍中中書令上開元令移

在侍中中書令下尚書六曹吏部兵部為前行戶刑為

中行禮工為後行其官屬自後行遷入二部者以為美

自魏晉以來凡吏部官屬悉高於諸曹其遷舉皆尚書

主之自隋置侍郎貳尚書之事則六品以下銓補多以

歸之唐自貞觀以前尚書掌五品選事

貞觀二十二年二月吏部侍郎

盧承慶兼檢校兵部侍郎仍知五品選事承慶辭曰五品選事職在尚書臣今掌之便是越局太宗不許曰朕

今信卿卿何不自信也由是言之即尚書兼知五品選事明矣

至景龍中尚書掌七品

以上選侍郎掌八品以上選至景雲元年宋璟為尚書

始通其選而分掌之因為常例開元以前諸司之官兼

知政事者午前議政於朝堂午後理務於本司自開元

以來宰相員少資地崇高又以兵吏尚書權位尤美而

宰臣多兼領之但從容衡軸不自銓綜其選試之任皆

侍郎專之尚書通署而已遂為故事或分領其事則列

為三銓

四年六月勅其員外郎御史并餘供奉官直進名勅授自此不在吏部

尚書掌其

一侍郎分其二

尚書所掌謂之尚書銓侍郎所掌其一為中銓其一為東銓各有印

侍郎二人

隋煬帝置說在歷代郎中篇凡六司侍郎皆貳尚書之事吏部初置一員總章元年加二

員龍朔二年改為司列少常伯咸通元年復舊分掌選部流內六品以下官是為銓衡之任凡初任進者無不仰屬焉當選集之際勢傾天下列曹之中資位尤重初隋世高孝基為吏部侍郎房玄齡杜如晦與選孝基特加賞異後以為知人唐文皇帝永徽時馬戴裴行儉為吏部侍郎貞觀以來最為稱職崔玄暉為之介然自守絕於請謁為執政者所忌轉文昌左丞選司令史乃設齋自慶武后聞之復拜為天官侍郎

郎中二人

漢魏以來尚書屬或有侍郎或有郎中或曰尚書郎或曰某曹郎或則兩置或為互名雖

稱號不同其職一也皆今郎中之任山公啟事曰吏部郎主選舉宜得能整風俗理人倫者又曰吏部郎以辟

事日夜相接非但當正己而已乃當能正人不容穢雜也乃以議郎杜默為之又陸慧曉字叔明為吏部郎吏部都令史歷政以來咨執選事慧曉任已獨行未嘗與語帝遣左右以事請問之慧曉曰六十之年不復能諮都令史為吏部郎也然自過江吏部郎不復典大選又職官錄曰梁吏部郎舊視中丞遷侍中又陳吏部郎中秩六百石後魏孝文帝欲創革舊制選制百官謂羣臣曰為朕舉一吏部郎給卿三日假尋曰朕已得之矣乃徵崔亮為之亮字敬儒自參選事垂將二十年廉謹明決尚書曰非崔郎中選事不辦隋初諸曹郎皆謂之侍郎煬帝三年置六司侍郎後遂改諸曹侍郎但曰郎其吏部郎改為選部郎唐初復為選部郎中武德五年改為吏部郎中龍朔二年改為司列大夫咸通元年復舊掌選補流外官謂之小銓并掌文官名簿朝集錄賜假使并文官告身分判曹事

員外郎二人

隋開皇六年置吏部員外郎一人煬帝三年改為選部承務郎唐武德三年復舊加

置一人一員判廢置一員判南曹起於總章二年司列少常伯李敬玄奏置未置以前銓中自勸責故事兩員轉廳至建中元年侍郎邵說奏各挾闕替南曹郎王銅以後遂不轉廳貞元十一年閏八月侍郎杜黃裳奏舊例轉廳初武太后延載元年又加一員聖歷二年八月省開元十二年四月勅兵吏各事定兩人判南曹尋却一人判貞元元年九月又以兩人判至十二年閏八月又却一人判

司封郎中一人

左傳曰晉文公執秩以正其官注云執秩主爵秩之官漢尚書有封秩之任而

無其官故後漢書曰馮勤字偉伯光武以為郎中給事尚書使典諸侯封事勤量功次輕重國土遠近地勢豐薄不相踰越莫不厭伏焉自是封爵之制非勤不定晉尚書有左右主客曹北齊河清中改為主封置郎中一

人屬吏部主封爵之事隋初為主爵侍郎煬帝改為主爵郎武德初為主爵郎中龍朔二年改為司封大夫咸亨元年復舊光宅元年改為司封郎中掌封爵皇之族及諸親內外命婦告身及道士女冠等天寶八載十一月勅道士女冠籍每十載一造永為常式至德二年十一月勅道士女冠等宜依前屬司封曹

員外郎一人

隋文帝置煬帝改為主爵承務郎武德初為主爵員外郎其後曹改而官不易

司勳郎中一人

周禮夏官有司勳上士掌六卿賞地之法歷代無聞至後周吏部有司勳上士

一人掌六勳之賞以等其功如古之主爵隋文帝置司勳侍郎煬帝改為司勳郎龍朔二年改為司勳大夫咸亨初復故掌校定勳績通初復故掌校定勳績論官賞勳官告身等事

員外郎二人

隋文帝置煬帝改為司勳承務郎至武德初乃改為司勳員外郎

考功郎中一人

漢文帝時京房作考功課吏之法然其職不在尚書至光武改尚書三公曹主

歲書考課諸州郡魏尚書有考功定課二曹宋元嘉三年又置功論郎並其任也例在吏部郎中後魏考功郎掌考第孝秀北齊課功郎中亦掌考第及孝秀貢士隋文帝置考功侍郎煬帝改為考功郎武德初復為考功郎中龍朔二年改考功為司績咸通初復舊掌考察內外百官及功臣家傳碑頌誄諡等事

員外郎一人

隋文帝置煬帝改為考功承務郎武德初復為考功員外郎其後曹改而官不易武

德舊令考功郎中監試貢舉人貞觀以來乃以員外郎專掌貢舉省郎之殊美者至開元二十四年移貢舉於禮部而考功員外郎分判事而已

宋朝典選之職自分為四文選二曰審官東院

太平興國六年

命郭贊考京朝官課淳化二年置磨勘京朝官院又以興國中所置差遣院併入號磨勘差遣院亦名考課院淳化四年以考課京朝官院為審官院而凍水記聞云太宗患中書權太重向敏中時為諫官請分中書吏房置審官院刑房置審刑院熙寧間置審官西院以主武選於是改審官院為審官東院焉曰流內銓實錄淳化四年以幕職州縣考課院歸流內銓武選二命翰林學士蘇易簡領其事自後命近臣主之

曰審官西院

凍水記聞云王介甫與韓子華合謀欲沮文潞公且奪其權一日發中旨置審官西

院樞密初不知也

曰三班院

實錄淳化三年詔置三班院以崇儀副使蔚進掌之先是供奉官等

悉隸宣徽院至是別置三班院以考殿最自後多命近臣以主之

元豐定制以審官東

院為尚書左選審官西院為尚書右選流內銓為侍郎

左選三班院為侍郎右選

道鄉集蘇丞相行狀唐制文選掌於吏部武選則兵部主

之掌文武官選授勲封考課之政令文臣寄祿官自朝

議大夫職事官自大理正以下非中書省敕授者歸尚

書左選武臣陞朝官自皇城使職事官自金吾衛仗司

以下非樞密院宣授者歸尚書右選自初仕至州縣幕

職官歸侍郎左選自借差監當至供奉官軍使歸侍郎

右選凡分職為三封爵贈官之事則司封主之賜功定

省之事則司勲主之官資課最名諡之事則考功主之

凡應注擬升移叙復蔭補及酬賞封贈者隨所分隸校勘法例團甲以上尚書省即法例可否不決應取裁者亦如之若中散大夫閭門使以上則列遷叙之狀上中書省樞密院得盡給告身則通書尚書侍郎及所隸郎

官

續會要

尚書左右選凡十五案

左選掌闕案知闕案六品案七品案八品案九

品知雜上案下案甲庫案右選流擬案大使臣案小使臣案甲庫案掌注案知雜案告身案

侍郎左

右選凡十五案

左選注擬知闕案補闕案參軍上案下案主簿上案下案縣尉上案下案入宮

案甲庫案格式案過院案右選注擬上案下案供奉官案殿直案甲庫案掌法案知一案

而四選密

矣 尚書從二品掌文武之選事而奉行其制命凡天下員闕具注諸籍月取其應選者揭而書之集官注擬考其閥閱以定可否凡選授封爵功賞課最之事皆所隸郎官驗實而後判成焉若有疑不能決則稟議於尚書省即應論奏與郎官同上殿 侍郎從三品掌文臣未改秩者凡始命或有殿負皆試而後選若應遷格則團甲同郎官引見於便殿稟奏改官右選掌武臣未陞朝者凡所任而試不中等及已入官而未應選者皆勿

注正闕若選路分都監將官閤門祇候都總管司承受
皆以名上樞密院視朝入閤則執文武班簿對立官制
尚書侍郎同治曹事奏事則同班惟吏選分領四選有
所論奏則各以選事同所隸郎官上殿元豐寄祿吏部
尚書為金紫光祿大夫六部侍郎為正議大夫南渡初
諸曹尚書侍郎互置惟吏部備官紹興八年依元祐制
六曹皆置權尚書以處未應資格之人建炎四年六曹
置權侍郎如元祐制滿二年為真補外者除待制未滿

除修撰舊制吏部除侍郎二員分典左右選總稱吏部侍郎間命官兼攝惟稱左選侍郎或右選而已紹熙三年謝深甫張叔椿兼攝始有侍左侍郎侍右侍郎之稱既而自林大中沈揆擢貳尚書則侍左侍右徑入除目相承不改 郎中主管尚書左右選及侍郎左右選各一員參掌選事而分治之凡郎官並用知縣資序以上充未及者為員外郎元豐寄祿為朝請大夫建炎四年詔權攝添差郎官並罷初進擬第云吏部郎官及擬告

身細銜始具言吏部尚書郎中或員外郎主管尚書某
選主管侍郎某選紹興間呂希常以監六部門兼權侍
右侍郎李端民正除尚右郎官既而何備楊倓費行之
除吏部郎官皆有侍左侍右尚左尚右之稱自此相承
不改乾道元年詔令後非曾任監司守臣不除郎官著
為令自是館學寺監丞拘礙資格遷除不行郎曹闕員
但得兼攝旋即外補間有不次擢用者則自二著躐升
二史以至從列其自外召至為郎則資級已高曾不數

月即序進卿少而郎有正員者益少矣 司封判司事

一人初以無職事朝官充凡封爵之制一出於中書本

司但掌定諡先期戒本部赴集而已元豐官制行始實

行本司事掌封爵叙贈奏蔭承襲之事寄祿為朝請大

夫 司勲掌勲賞事凡勲十有二級自上柱國至武騎尉自從七

品推而上之至正三品三歲一遷必因其除授以加之

凡賞有格若事應賞從所隸之司考實以報審核以上

尚書省寄祿為朝請大夫隆興初詔省併司勲郎中以

司封郎中兼領 考功判司事一人以帶職朝官或無

職事朝官充凡考課之法分隸他司或以他司專領本

司但掌覆太常擬諡及幕府州縣官流外較考之事元

豐官制行郎中員外郎始實行本司事續會要初除蔡岫

蔡京職畧掌文武遷叙磨勘資任考課之政令凡命官隨

所隸選以其職事具注於歷給之於其屬州若司歲書

其功過應升遷選授者驗歷按法而叙進之有負殿則

正其罪罰以七事考監司以四善三最考守令凡改服

色者以年勞計之應諡者覆太常所定行狀報尚書省
官集議以聞凡立碑碣名額之事掌之舊置考課院其
定殿最皆有考辟元豐悉罷分案十有七

五品案六品案七品案八

品案九品案職官案參軍案令丞案主簿案縣尉案使副案供奉官案資任案校定案法案知雜案元祐

三年詔知州課法吏部上其事於尚書省送中書省取

旨縣令以下本部專行官告院主管官二員舊制掌

吏兵勲封官告以給妃嬪王公文武品官內外命婦及
封贈者四選皆用吏部印惟蕃官用兵部印凡綾紙幅

數標軸名色皆視其品之高下應奏鈔劃聞者給之大

觀併歸尚書省政和仍歸吏部

差主管官

戶部尚書

侍郎

郎中

員外郎

度支郎中

郎中

員外郎

金部郎中

員外郎

倉部

周禮地官大司徒之職掌建邦之土地之圖與其人民

之數

按今戶部之職與地官之任雖亦頗同若徵其承受考其沿襲則戶部合出於度支度支主計算之

官也 算計之任本出於周禮天官之司會云

又太宰之屬有司會以九貢之

法致邦國之財用以九賦之法令田野之財用以九功

之法令民職之財用以九式之法均節邦之財用掌國之官府郊野縣都之百物財用凡在書契版圖者之貳以逆羣吏之治而聽其會計

逆謂受而鈎考之可知得失多少

漢置尚

書郎四人其一人主財帛委輸至魏文帝置度支尚書

寺專掌軍國支計吳有戶部

吳孫休初即位戶部尚書階下讀奏

而晉有

度支

晉當陽侯杜元凱為度支尚書內以利民外以救邊備物置用以濟當時之益者五千餘條又張華

為度支尚書量計運漕決定廟算

皆主算計也宋齊度支尚書領度支

金部倉部起部四曹梁亦有之後魏度支亦掌支計

崔亮

為度支尚書經營費用歲減億計

北齊度支統度支

學計會凡軍國損益供糧廩等事

倉部左戶

左戶掌天下計帳戶口

右戶

掌天下公私田宅租課

金部庫部六

曹後周置大司徒卿一人如周禮之制其屬有民部中

大夫二人掌承司徒教以籍帳之法贊計人民之衆寡

隋初有度支尚書則并後周民部職

漢武帝初置尚書有民曹主凡吏民

上書悉經此曹主之後漢光武改民曹主繕修工作鹽池苑圃魏置左民尚書晉惠帝又加置右民尚書至於宋齊梁陳皆有左民尚書而後魏有左民右民等尚書多領工役非今戶部之例而梁陳兼掌戶籍此則略同自周隋有民部始當今戶部之職

開皇三年改度支為民部統度支民

部金部倉部四曹國家修隋志謂之戶部蓋以廟諱故

也

煬帝時韋中為民部尚書又武德二年隋民部尚書蕭瑀為相府司錄

唐永徽初復改

民部為戶部廟諱故也

太宗在位詔官名及公私文籍有世民兩字不相連者並不諱

至高宗始諱之

顯慶元年改戶部為度支龍朔二年改度支尚

書為司元太常伯咸亨元年復為戶部尚書初戶部居

禮部之後武太后改置天地四時之官以戶部為地官

由是遂居禮部前神龍元年復改地官為戶部總判戶

部度支金部倉部事

侍郎二人

蓋周官小司徒建大夫職同其任後周依周官今侍郎則隋煬帝置民部侍郎唐因之後

改曰戶部龍朔二年改為司元少常伯咸亨元年復為戶部侍郎他時曹名或改而官號不易舊制一員長安

四年加一員神龍元年減二年復加

郎中二人

漢尚書郎一人主戶口墾田吳時張溫為尚書戶曹郎魏有民曹郎晉分為左右民曹宋

齊以下或為左民或為左戶後魏有戶部郎北齊有左右民曹同在吏部郎中篇隋初為戶部侍郎煬帝除侍

字隋末改為民部郎武德初為民部郎中龍朔二年改郎中為大夫咸通元年復舊他時曹名或改而官號不

易掌戶口籍帳賦役孝義優復蠲免婚姻繼嗣百官衆庶園宅口分永業等建中三年正月戶部侍郎判度支

杜佑奏天寶以前戶部事繁所以郎中員外各二人判署自兵興以後戶部事簡度支事繁唯郎中員外各一

人請廻輟郎中員外各一人分判度支案
待天下之兵革已息却歸本曹奉敕依

員外郎二人

隋文帝置煬帝改為承務郎武德三年復為員外郎

度支郎中一人

漢初張蒼善算以列侯主計居相府領郡國上計者謂之計相殆今度支之任

魏尚書有度支歷代度支具尚書中隋初為度支侍郎
煬帝除侍字武德加中字龍朔二年改度支為司度咸
亨元年復舊掌支使國用開元二十四年三月戶部尚
書同中書門下三品李林甫奏租庸丁防和糴春綵稅
草諸色旨符每年一造據州府及諸司計紙當五十萬
張仍差百司抄寫事甚勞煩條目既多詳檢難過緣無
定額支稅不常亦因此涉情兼長姦偽臣今與採訪使
及朝集使商量有不穩便於人非當土所出者隨意沿
革務從允便即人知定准政有常文編成五卷以為長
行首冠省事司每年但收應支物數頒行每州不過一

兩紙仍附驛送勅依至德以後戎事費多二年十二月
呂諲為兵部侍郎平章事充勾當度支使上元元年五
月劉晏為戶部侍郎勾當度支使寶應元年正月劉晏為戶部侍
郎勾當度支使二年二月韓滉以宰相加度支使五月
二日竇參為中書侍郎平章事度支使自後雖無亦有
他官判或云權判亦云專判

員外郎一人

改置與戶部
員外郎同

金部郎中一人

周官有職金掌金玉錫石丹青之令魏
尚書有金部郎其後歷代多有之北齊

金部主才量尺度內外諸庫藏文帳隋盧昌衡字子均
祖孝徵薦為尚書金部郎每謂人曰吾用盧子均為尚
書郎自謂無愧幽寔矣隋初為金部侍郎煬帝除侍字
武德中加中字龍朔二年改金部為司珍咸亨初復舊

天寶中改為司金至德初復舊掌庫藏金寶貨物權衡度量等事自開元二年置鑄錢使皆以他官為之

員外郎一人

改置與戶部員外郎同

倉部郎中一人

周官有倉人主藏九穀又有廩人主藏九穀之數賙賜稍食魏尚書有倉部郎

後魏有太倉尚書亦其任也故後魏書曰李訢為太倉尚書攝南部事令千里之外戶別轉運詣倉輸之所在委積延停歲月大為困弊歷代多有倉部曹皆掌倉廩之事後周有地官屬司倉下大夫隋初為倉部侍郎煬帝除侍字武德中加中字龍朔二年改倉部為司廩咸亨初復舊天寶中改為司儲至德初復舊掌諸倉廩之事開元二十六年以後置出納使皆以他官為之訢音許斤切

員外郎一人

改置與戶部員外郎同

宋制戶部判部事一人以兩制以上充凡戶口田產錢穀食貨之政令皆歸於三司

三司謂鹽鐵戶部度支也

本曹但受天

下之土貢元會陳於庭而已熙寧中以知樞密院陳升之參知政事王安石制置三司條例建官設屬取三司條例看詳所行事付之三年罷歸中書以常平免役農田水利新法歸司農以胄案歸軍器監修造歸將作監推勘公事歸大理寺帳司理欠司歸比部衙司歸都官坑冶歸虞部而三司之權始分矣元豐官制行罷三司

歸戶部左右曹而三司之名始泯矣舊三司使即今尚書副使即今侍郎權發遣副使即今權侍郎三司判官推官及判子司官即今郎中員外郎之任也建炎兵興嘗以知樞密院張懋提領措置戶部財用後進中書侍郎仍兼之五年復以參知政事孟庾提領措置後罷專委戶部長貳左曹分案三曰戶口掌諸路州軍縣戶口升降民間立戶分財科差人丁興賣屋業陳告戶絕索取妻男之訟曰農田掌農田及田訟務限奏豐稔驗水

旱蟲蝗勸課農桑請佃地土令佐任滿賞罰繳奏諸州
雨雪檢案災傷逃絕人戶曰檢法掌凡本部檢法之事
設窠有三曰二稅掌受納驅磨隱匿支移折變曰房地
掌州縣樓店務房廊課利僧道免丁錢及土貢獻物曰
課利掌諸州軍酒課利比較增虧知通等職位姓名人
戶買撲鹽場酒務祖額酒息賣田投納牙契外有開折
知雜司右曹分案有六曰常平掌常平農田水利及義
倉賑濟戶絕田產居養鰥寡孤獨之事曰免役曰坊場

曰平準各隨其名而任其事曰檢法曰知雜紹興二年韓肖胄言財賦舊悉隸三司今戶部正有上供之目諸路窠名戶部不能悉知漕司不能悉問失一窠名則所入亦失矣願詔諸路漕司括州郡出入可併罷者立定籍使漕司總諸州戶部總諸路則出入無陷矣淳熙中詔以左藏南庫撥隸戶部侍郎掌治左右曹職事元豐官制戶部侍郎一人中興初只除長貳各一員若止除尚書若侍郎一員紹興四年詔戶部侍郎通治左右

曹自此相承不改

郎中

左曹
右曹

掌分曹治事建炎三年

詔省併郎曹惟戶部五司以職事煩劇不併仍各置一員淳熙九年詔戶部郎官兼主管左藏南庫初置主管度支郎中掌周知軍國財用會其出入之數凡上供有額封樁有數科買有期皆掌之有所漕運則計程而給其直凡内外支供及俸給驛券賞賜衣服錢帛先期擬度時而予之金部掌金帛貨寶之入以待邦用以年額拘催受給建炎元年詔常平司見管山澤坑冶並依

舊撥隸金部三年詔罷太府寺隸金部 倉部掌倉芻

粟出納之事建炎三年罷司農寺歸倉部紹興四年復

置司農寺

禮部尚書

侍郎

郎中

員外郎

祠部郎中

員外郎

膳部郎中

員外郎

主客

郎中

員外郎

唐虞之時秩宗典三禮周禮春官大宗伯掌建邦之天

神人鬼地祇之禮後漢尚書吏曹兼掌齋祀亦其職也

魏尚書有祠部曹及晉江左有祠部尚書掌廟祧之禮

常與右僕射通職不常置以右僕射攝之

歷代皆與右僕射通職

宋祠部尚書領祠部儀曹二曹齊梁陳皆有祠部尚書

後魏為儀曹尚書北齊祠部尚書統祠部

掌祠祀醫藥死喪贈賻

主客虞曹屯田起部五曹又有儀曹主吉凶禮制屬殿

中尚書後周置春官卿又有禮部而不言職事後改禮

部為宗伯又春官之屬有典命

掌內外九族之差及主器衣服之令沙門道士

之法後改典命為大司禮俄改大司禮復為禮部謂之禮

部大夫

後周盧凱為禮部大夫充聘陳使

至隋置禮部尚書統禮部祠

部主客膳部四曹蓋因後周禮部之名兼前代祠部儀曹之職唐龍朔二年改禮部尚書為司禮太常伯咸亨元年復舊光宅元年改禮部為春官神龍元年復舊總判祠部禮部膳部主客事

侍郎一人

周官春官小宗伯中大夫頗同今任後周依周官今侍郎則隋煬帝置唐因之龍朔二年

改為司禮少常伯咸亨元年復舊他時曹名或改而官守不易掌策試貢舉及齋郎弘崇國子生等事舊制考功員外郎掌貢舉開元二十三年考功員外郎李昂為進士李權所詆朝議以考功位輕不足以臨多士至二十四年遂以禮部侍郎掌焉開元天寶之中昇平既久羣士務進天下髦彥皆其取舍故勢傾當時資與吏部

侍郎
等同

郎中一人

周官春官肆師下大夫亦頗同今任魏尚書有儀曹郎掌吉凶禮制歷代多有例在吏部

篇宋齊儀曹屬祠部梁書曰武帝謂徐勉云今帝業初構須一人通學藝解朝儀者為尚書儀曹郎勉曰孔休源識具清通詳練政事自晉宋起居注畧誦上口遂拜為儀曹郎後周依周官隋初為禮部侍郎煬帝除侍字又改為儀曹郎武帝初改為禮部郎中龍朔二年改為司禮大夫咸亨初復舊其後曹改而官不易掌禮樂學校儀式制度衣冠符印表疏冊命祥瑞鋪設喪葬贈賻及官人等

員外郎一人

周禮肆師上士後周依馬至隋文帝置禮部員外郎煬帝改為儀曹承務郎武德三

年復舊其後曹
改而官不易

祠部郎中一人

魏尚書有祠部郎歷代皆有主禮制後魏裴修為中大夫兼祠部曹祠部曹主

禮樂每有疑議修撰斟酌故實咸有條貫後周有典祠中大夫隋初為侍郎煬帝除侍字武德中加中字龍朔二年改為司裡大夫咸亨元年復舊延載元年五月制天下僧尼隸祠部不須屬司實開元二十年正月制僧尼隸祠部天寶十一載改祠部為職祠至德初復舊掌祠祀天文漏刻國忌廟諱卜祝醫藥等及僧尼簿籍自天寶六載及至德三年常置祠部使以他官為之

員外郎一人

改置與戶部員外郎同

膳部郎中一人

膳部於周官即膳夫凌人二職也晉尚書有左士右士曹後魏都官尚書管左

士郎北齊改左士為膳部郎掌侍官百司禮食餼饌屬都官尚書後周有膳部大夫一人亦掌飲食屬大冢宰

隋膳部屬祠部初置侍郎煬帝除侍字武德中加中字
龍朔二年改為司膳大夫咸亨初復舊天寶十一載又
改膳部為司膳至德初復
舊掌飲膳藏水及食料

員外郎一人

改置與戶部
員外郎同

主客郎中一人

漢成帝初置尚書有客曹主外國夷狄
後光武分改為南主客北主客二曹至

魏亦為南主客事晉氏分為左右南北四主客或單為
客會客齊梁陳單有主客後魏吏部管南主客祠部管
左主客北齊改左主客為主爵南主客為主客隋初為
侍郎煬帝除侍字尋又改為司籍郎武德初改為主客
郎中龍朔二年又改主客為司藩咸
亨元年復舊掌二王後及諸藩朝聘

員外郎一人

改置與戶部
員外郎同

宋禮部判部事二人以兩制及帶職朝官以上充凡禮儀之事悉歸於太常禮院而貢舉之政領於知貢舉官本曹但掌制科舉人補奏太廟郊社齋郎室長掌座都省集議百官謝賀表章諸州申舉祥瑞出納內外牌印之事而兼領貢院官制行始正其職凡天地宗廟陵園之祀后妃親王將相封冊之命皇子加封公主降嫁稽其儀以詔上下而舉行之朝廷慶會宴樂宗室冠婚喪祭蕃使去來宴賜與夫經筵史館賜書修書之禮例皆

同奉常講求參酌而定其儀節三歲貢舉學校試補諸生皆總其政旌節章服之頒祥瑞表奏之進凡關於禮樂者皆掌之建炎三年詔鴻臚光祿寺併歸於禮部太常國子監亦隸之焉分案五曰禮樂曰貢舉曰宗正奉使帳曰封冊表曰檢法各隨其名而治其事 侍郎貳

尚書之事南渡諸曹長貳互置紹興七年禮部置侍郎二員隆興初詔尚書不常置禮部侍郎置一員 郎中參預禮樂祭祀朝會宴享學校貢舉之事有所損益則

審訂以次咨決凡慶賀若謝掌撰表文與祠部主客膳部並列為四建炎四年併省郎曹禮部領主客祠部領膳部隆興初復詔禮部祠部一員兼領自是併行四司之事矣祠部掌諸州宮觀僧尼道士童行住持教門事務祠祭奉安祈禱神廟加封賜額並屬之醫官磨勘醫生試補校其事而予奪之主客掌諸蕃朝貢宴設賜予之事膳部掌祠寺奏告牲牢禮料及宴設酒食果實之事收冰藏冰賜冰以時無闕事御厨翰林司牛

羊司隸焉

兵部尚書

侍郎

郎中

員外郎

職方郎中

駕部郎中

員外郎

庫部

郎中

員外郎

周禮夏官大司馬之職以九伐之法正邦國制軍誥禁

以糾邦國領校人牧師職方司兵之屬即今兵部之任

也魏置五兵尚書

周官有司兵掌五兵五盾各辨其物與其等以待軍事五兵之名當出於

此鄭司農云五兵者戈殳戟酋矛夷矛也

五兵謂中兵外兵騎兵別兵都兵

也晉初無太康中乃有五兵尚書而又分中兵外兵各

為左右

按晉雖分中兵外兵為左右與舊五兵為七曹然尚書唯置五兵而已無七兵尚書之名至後

魏始有七兵尚書耳今諸家著述或謂晉太康中置七兵尚書誤矣

宋五兵尚書唯領中

兵外兵二曹餘則無矣齊梁陳皆有之後魏為七兵尚

書北齊為五兵統左中兵

掌諸都督告身諸宿衛官

右中兵

掌畿內丁帳事

諸兵力士

左外兵

掌河南及潼關以東諸部丁帳及發召諸兵

右外兵

掌河北及潼關以西

諸州所典與左外兵同

都兵

掌鼓吹大樂部小兵等事

五曹後周置大司馬其

屬又有兵部中大夫小兵部下大夫其職並闕至隋有

兵部尚書統兵部職方駕部庫部四曹蓋因後周兵部

之名兼前代五兵之職唐龍朔二年改兵部尚書為司
戎太常伯咸亨元年復舊光宅元年改為夏官神龍元
年復舊天寶十一載改為武官

至德初復舊

掌武官選舉總

判兵部職方駕部庫部事其分領選舉亦為三銓制如

吏部

尚書所掌謂之兩書侍郎所掌其一為中銓其一為西銓各有印

侍郎二人

煬帝置唐因之龍朔二年改為司戎少常伯咸亨元年復舊他時曹名或改而官不易舊

制一員總章元年加一員掌武職武勳官三衛及兵士以上簿書朝集祿賜假使差發配親士帳內考覈及給

武職
告身

郎中一人

歷代兵部曹皆有部具尚書中或單為郎或置郎中例在吏部郎中篇隋初為兵部侍郎

煬帝除侍字改為兵部曹郎武德三年改為兵部郎中龍朔二年改為司戎大夫咸亨元年復舊掌與侍郎同

員外郎二人

隋文帝置兵部員外郎煬帝改為兵曹承務郎武德三年復舊其後曹改而官不易

職方郎中一人

周禮夏官有職方氏掌天下之圖辨九州之國歷代無聞至後周依周官隋初

有職方侍郎煬帝除侍字武德中加中字龍朔二年改為司城大夫咸亨元年復舊掌地圖城隍鎮戍烽候防

人路程遠近
親化首渠

員外郎一人

周官夏官職方上士後周依周官隋改置與戶部員外郎同

駕部郎中一人

周禮夏官之屬有輿司馬又有校人主馬之官又有牧司掌牧放又有巾車掌

公車之政及王之五輅此皆駕部之本也魏晉尚書有
駕部郎宋時駕部屬左民尚書齊亦有之後魏與北齊
並曰駕部郎中後周有駕部中大夫屬夏官隋初為駕
部侍郎屬兵部及辛公義為駕部侍郎勾檢馬牧所獲
十餘萬匹文帝喜曰唯我公義奉國忠煬帝除侍字武
德二年加中字龍朔二年改為司輿大夫咸亨初復舊
天寶中改駕部為司駕至德初復舊掌輿輦專乘郵驛
廐牧司牛馬驢騾闌遺離畜開元十八年閏六月敕比
來給傳使人為先傳馬事頗勞煩自今以後應乘傳者
宜給紙券二十三年十月敕新給都督刺史并關三官
州上佐並給驛發遣二十八年六月敕有陸驛處
得置水驛自二十年以後常置館驛以他官為之

員外郎一人

周官有輿上士後周有小駕上
士蓋其任也至隋置輿戶部同

庫部郎中一人

周官有司甲掌戈盾弓矢之長各辨其
物以待軍事魏尚書有庫部郎晉因之

宋庫部主兵仗文帝宴會有荒服外歸化人帝問尚書庫部郎顧琛曰庫中仗有幾許琛跪對曰有十萬人仗武庫仗多祕不言帝既問失言及琛跪對善之歷代或有或闕後魏北齊庫部屬度支尚書掌凡戎仗器用後周有武藏中大夫隋屬兵部初為庫部侍郎煬帝除侍字武德中加中字龍朔二年改為司庫大夫咸亨初復舊天寶十一載又改庫部為司庫至德初復舊掌軍器儀仗鹵簿法式及乘具等

員外郎一人

周官有司兵中士後周有小武藏下大夫隋改置與戶部同

宋兵部判部事一人凡籍武官軍師卒戎之政令悉歸於樞密院其選授小者又歸三班本曹但掌三駕儀仗鹵簿字圖釋奠武成王廟及武舉事歲終以義勇兵箭

手寨兵之數上於朝元豐更制惟民兵馬政權隸樞密院武官銓選并歸吏部五年詔應緣義勇保甲事並隸樞密院其餘民兵悉隸兵部以什伍之法教民為兵以選舉之法試武士以鹵簿字圖分布儀衛以郡縣之圖周知地域凡廂軍蕃兵刺員及金吾街仗司人兵稽其數而振飭其藝大將出征告捷於廟破賊露布以聞臣僚之家宣借兵級與夫蕃夷屬戶授官封襲之事皆掌之建炎三年併衛尉寺隸焉分案十曰賞功曰民兵衛

曰廂兵曰人從看詳曰帳籍告身曰武舉曰蕃官曰開
折曰知雜曰檢法 侍郎南渡後長貳互置續侍郎二
員隆興常置一員 郎中建炎三年詔兵部兼職方駕
部兼庫部隆興初詔駕部兵部郎官共一員兼領自是
四司合為一矣厥後間或並置若從軍或將命於外則
假以為寵 職方掌天下地圖以周知方域之廣及城
隍堡塞烽候之事蕃夷歸朝內附之事 駕部掌輦路
車乘廐牧雜畜乘具傳驛之政令辨其出入之數建炎

三年詔併太僕寺隸焉太僕有騏驎車輅二院

左右騏驎院監

官二員以武臣充掌司國馬總教駿四指揮之衆以養銀諸馬每一指揮百人為額車輅院掌供乘輿法物

庫部掌軍器儀仗鹵簿法式隨軍防城什物及凡供帳之事

洪氏容齋隨筆曰唐因隋制尚書置六曹吏部兵部分掌銓選文屬吏部武屬兵部自三品以上官冊授五品以上制授六品以下勅授皆委尚書省奏擬兩部各列三銓曰尚書銓尚書主之曰東銓

曰西銓侍郎二人主之吏居左兵居右是為前行
故兵部班級在戶刑禮之上睿宗初政以宋璟為
吏部尚書李乂盧從愿為侍郎姚元之為兵部尚
書陸象先盧懷慎為侍郎六人皆名臣二選稱治
其後用人不能悉得賢然兵部為甚其變而為三
班流外銓不知自何時元豐官制行一切更改凡
選事無論文武悉以付吏部蘇東坡當元祐中拜
兵書謝表云恭惟先帝復六卿之名本欲後人識

三代之舊古今殊制間劇異宜武選隸於天官兵
政總於樞府故司馬之職獨省文書蓋紀其實也
今本曹所掌惟諸州廂軍名籍及每大禮則書寫
蕃官加恩告雖有所轄司局如金吾街仗司驂驥
車輅象院法物庫儀鸞司不過每季郎官一徃耳
名存實亡一至於此

刑部尚書

侍郎

郎中

員外郎

都官郎中

員外郎

比部郎中

員外郎

司門

郎中

員外郎

唐虞之時士官以正五刑周禮秋官大司寇掌邦之三
典以佐王刑邦國蓋其任也漢成帝時尚書初置二千
石曹主郡國二千石又置三公曹主斷獄後漢光武改
三公曹主歲盡考課諸州郡政二千石曹掌中都官水
火盜賊辭訟罪法亦謂之賊曹重於諸曹

華譚集尚書
二曹論曰劉

道真問薛令長在吳何作答曰為吏部尚書問曰吳待
吏部何如餘曹答曰並通高選吏部特一時之後劉曰
晉魏以來俱爾獨謂漢氏重賊曹為是吳晉重吏部為
非薛君曰八座秩同班等其選並清宜同一揆若人才
或多或少選例難精如不得已吏部職掌人物人物難
明謂吳晉為得君何是古而非今劉難曰今吏部非為

能刊虛名舉沉朴者故錄以成人位處三署聽曹探鄉
論而用之耳無煩乎聰明賊曹職典刑獄刑獄難精是
以欲重之答曰今之賊曹不能聽聲觀色以別真偽縣
不能斷讞之尚書也夫在獄者率小人在朝者率君子
小人易檢君子難精俱不得
已吏部宜重賊曹宜輕也 魏青龍二年置尚書都官

郎佐督軍事晉復以三公尚書掌刑獄宋三公比部皆

主法制又置都官尚書主軍事刑獄領都官水部庫部

功論四曹齊梁陳並有都官尚書後魏亦有都官尚書

北齊都官統都官

掌畿內非
為得失

二千石

掌畿內
得失

比部水部

膳部五曹又有三公曹掌諸曹囚帳斷罪赦日建金雞

等處

又掌五時讀時令

屬殿中尚書後周有秋官大司寇卿掌

刑邦國其屬官又有刑部中大夫掌五刑之法隋初有都官尚書開皇三年改都官為刑部尚書統都官刑部比部司門四曹亦因後周之名唐因之龍朔二年改刑部尚書為司刑太常伯咸亨元年復舊武太后改刑部為秋官神龍初復舊天寶中改為憲部至德初復舊總判刑部都官比部司門事

侍郎一人

周官小司寇中大夫蓋今任也後周依周官至隋煬帝置刑部侍郎唐因之龍朔二年改

為司刑少常伯咸亨元年復舊他時曹名或改而官號不易掌律令定刑名案復大理及諸州應奏之事

郎中二人

周官大司寇屬官有士師下大夫蓋今任也漢尚書有三公曹後漢有二千石曹魏有都

官曹皆掌刑法獄訟之事歷代沿革具尚書中或為侍郎或置郎中例在吏部郎中篇後周有小刑部下大夫屬秋官府隋初置刑部侍郎煬帝除侍字又改為憲部郎武德三年改為刑部郎中龍朔二年改為司刑大夫咸亨元年復舊與侍郎同

員外郎二人

隋文帝置刑部員外郎煬帝改為憲部承務郎武德三年改為刑部員外郎其後曹

改而官
不易

都官郎中一人

漢司隸校尉屬官有都官從事掌中都官不法事後漢又改尚書二千石曹掌

中都官水火盜賊魏青龍二年始置尚書都官郎佐督
軍事晉宋尚書都官無主刑獄歷代事具尚書中其官
例在吏部郎中注後周則曰司厲隋初為都官侍郎掌
簿錄配役官私奴婢良賤訴競俘囚等事煬帝除侍字
置員外二人武德三年加中字減一人龍朔二年改為
司僕大夫咸亨元年復舊掌簿錄配役官奴婢簿籍良
賤及部曲客
女俘囚之事

員外郎一人

周官曰司厲下士蓋並今任也
後周依焉隋改置與戶部同

比部郎中一人

魏尚書有比部曹晉因之宋時比部主
法制齊梁陳皆有比部曹後魏亦然北

齊掌詔書律令勾檢等事後周曰計部中大夫蓋其任
也隋初為比部侍郎煬帝除侍字武德中加中字龍朔
二年改為司計大夫咸亨元年復舊天寶十一載又改
比部為司計至德初復舊掌內外諸司公廨及公私債

負徒役公程贓物
帳及勾用度物

員外郎一人

改置與戶部
員外郎同

司門郎中一人

周禮地官有司門下大夫掌授管鍵啟
閉歷代多闕至後周依周官隋初有司

門侍郎煬帝除侍字武德三年加中
司門大夫咸亨元年復舊掌門籍關橋及道路過所關
遺物事

員外郎一人

周官有司門上士後周
依焉後改置與戶部同

宋刑部判部事二人以御史知雜以上或朝官充淳化

二年以刑部覆大辟案增置審刑院

知院事一人以郎
官以上至兩省充

詳議官以京朝官充掌詳議大理
所斷案牘而奏之治所在右掖門凡四方以刑獄來上

則讞於審刑院大中祥符二年置糾察在京刑獄司

糾察

官二人以兩制以上充詳正
駁奏在京刑禁徒以上罪者

元豐三年併歸刑部五年

官制行刑部始專其官侍郎舊制定奪審復除雪叙

復移放尚書專領之若制勘體量奏讞糾察錄問長貳

通治之中興長貳互置隆興常置一員淳熙依崇寧專

法奏獄及法令事請大理寺官赴部共議郎中二人

分左右廳掌詳覆叙雪之事建炎時郎中二員職無分

異紹興時詔依元豐舊法分廳治事左以詳覆右以叙
雪使官各有守人各有見參而任之 都官掌在京百

司吏職補換更替或以功過展減磨勘則依條制行之
諸路州軍編配羈管等人置冊以記其在亡建炎三年
詔比部兼司門隆興初詔都官比部各置一員自此都
官兼比部司門之事 比部掌勾稽文帳周知百司給
費之多寡凡諸倉場庫務收支各隨所隸以時具帳籍
申上比部驅磨審覆而會計其數諸受文歷每季終取

索審覈事故任支及贓罰欠債負則追索填納無隱昧
則勾銷除破 司門掌門關津梁道路之禁令凡所過
官吏軍民商販出入稽其詐偽

工部尚書

侍郎

郎中

員外郎

屯田郎中

員外郎

虞部郎中

員外郎

水部

郎中

員外郎

軍器所

文思院

周禮冬官其屬有考工掌百工之事曰國有六職百工
是其一焉漢成帝初置尚書有民曹主凡吏民上書後
漢光武改民曹主繕修功作鹽池園苑魏置左民尚書

亦領其職晉宋以來有起部尚書而不常置每營宗廟
宮室則權置之事畢則省以其事分屬都官左民二尚
書北齊起郎亦掌工造屬祠部尚書後周有冬官大司
空卿掌五材九範之法其屬工部中大夫二人承司之
事掌百工之籍而理其禁令至隋乃有工部尚書統工
部屯田二曹蓋因後周工部之名兼前代起部之職唐
龍朔二年改工部尚書為司平太常伯咸亨元年復舊
武太后改工部為冬官神龍初復舊總判工部屯田虞

部水部事

侍郎一人

隋煬帝改置工部侍郎唐因之龍朔二年改為司平少常伯咸亨元年復舊他時曹名或

改而官不易掌興造工匠諸公
廨屋宇五行并紙筆墨等事

郎中一人

晉尚書有起部曹歷代皆有具尚書中隋初為工部侍郎煬帝除侍字又改為起部郎武

德三年改為工部郎中龍朔二年改為司平大夫咸亨元年復舊其後曹名改而官不易所掌與侍郎同

員外郎一人

隋文帝置工部員外郎煬帝改為起部承務郎武德三年復為工部員外郎其後曹

改而官
不易

屯田郎中一人

漢成帝置尚書郎兩人其一人掌戶口墾田蓋尚書屯田郎之始也至魏尚書

有農部郎又其職也至晉始有屯田尚書及太康中謂之田曹後復為屯田江左及宋齊則左民郎中兼知屯田事梁陳則曰侍郎後魏北齊並為屯田郎隋初為屯田侍郎兼以掌儀武之事故隋書曰補或為屯田侍郎煬帝除侍字武德三年加中字龍朔二年改為司田大夫咸亨元年復舊掌屯田官田諸司公廨官人職分賜田及官園宅等

員外郎一人

改置與戶部員外郎同

虞部郎中一人

虞部蓋古虞人之遺職至魏尚書有虞曹郎中晉因之梁陳曰侍郎後魏北齊

虞曹掌地圖山川近遠園圃田獵雜木等並屬虞部尚書後周有虞部下大夫掌山澤草木鳥獸而阜蕃之又有小虞部並屬大司馬隋初為虞部侍郎屬工部煬帝除侍字武德中加中字龍朔二年改為司虞大夫咸亨

元年復舊天寶十一載又改虞部為司虞至德初復舊掌京城街巷種植山澤苑囿草木薪炭供須四稅等事

員外郎一人

隋置曹與戶部員外郎同龍朔以後曹名改而官不易

水部郎中一人

周禮夏官有司榆掌設國之五溝五塗而達其道路蓋其職也魏尚書有水部

郎歷代或置或否後魏北齊有水部屬都官尚書亦掌舟船津梁之事後周有司水大夫隋初為水部侍郎屬工部煬帝除侍字武德三年加中字龍朔二年改為司川大夫咸亨元年復舊天寶中改水部為司水至德初復舊掌川瀆津堰船艦浮橋溝渠漁捕運漕水碾磴等事

員外郎一人

後周小司水上士隋改曹與戶部員外郎同龍朔二年以後曹名改而官不易

宋制工部判部事一人以兩制以上充凡城池土木工

役皆隸三司修造案本曹無所掌元豐官制行尚書工部掌天下城池宮室舟車器械符印錢寶之事百工山澤溝洫屯田之政令是時尚書猶未除人紹興三年并少府監歸工部以文思院屬焉建炎并省將作少府軍器監並歸工部是時營繕未遑惟戎器方急紹興二年詔於行在別置作院一所專打造器甲令工部長貳專一提點郎官逐旬點檢少府監既歸工部文思院上下界監官並從本部辟差又詔御前軍器所隸工部自是

營造稍廣宰臣議戶部以給財為務工部以辦事為能
誠非一體欲令戶部兼領其事上雖然之卒未能合隆
興以後宮室器甲之造寢稀且各分職掌而起部之務
益簡特提其綱要焉分案六曰工作曰營造曰材料曰
兵匠曰檢法曰知雜舊又專立一案以御前軍器案為
名侍郎南渡初長貳互置隆興詔各置一員郎中
舊制凡製作營繕計置採伐材物按程式以授有司則
郎中員外郎參掌之建炎三年詔工部郎官兼虞部屯

田郎官兼水部隆興元年詔工部屯田共一員兼領自
此四司合為一矣 屯田掌凡屯田營田職田學田官
莊稻田塘陂堤堰之事 虞部掌凡山澤苑囿畋獵取
伐木石薪炭藥物之屬屏絕猛獸毒藥及茶礬場鹽池
井金銀銅鐵鉛錫坑冶廢置收採之事 水部掌凡川

瀆河渠津梁舟楫漕運水碾磴凡隄防疏濬之政令皆

掌之 軍器所

隸工部

提點官二員

紹興三十二年詔於邊臣內差

提轄

監造官各二員幹辦受給監門官各一員掌鳩工聚材

製造戎器之政令舊就軍器監置別差提舉官以內侍
領之紹興中改隸工部罷提舉官日輪工部郎官軍器
監官前去本所點檢監視後復以中人典領工部侍郎
黃中以為言請復隸屬從之三十二年孝宗即位有旨
增置提點官以內省都知李綽為之改稱提舉免隸工
部後以御史張震力爭復隸工部後改隸步軍司尋復
舊紹熙元年減省員額如上制 文思院隸工部提轄官

一員監官三員

內一員文臣
京朝官充

監門官一員掌金銀犀玉

工巧及綵繒裝鈿之飾凡儀物器仗權量輿服所以供
尚方給百司者於是出焉沿革附見權貨務都茶場提
轄官

六部監門

六部監門官一員掌司鑰紹興二年置選陞朝文臣有
才力人充仍令六部踏逐奏差序位請給依寺監丞郎
官有關得兼之初從吏部尚書沈與求之請也

主管架閣庫

掌儲藏帳籍文案以備用擇選人有時望者為之舊有
管幹架閣庫官宣和罷之紹興十五年復置吏戶部各
差一員禮兵部共差一員刑工部共差一員以主管尚
書某部架閣庫為名從大理寺丞周楸之請也嘉定八
年又置三省樞密院架閣官


三省樞密院監門官

舊以小使臣為之嘉定六年諫官鄭景紹言部門以京
朝官則省門事體尤重遂亦命京朝官曾作縣通判資

序人為之



文獻通考卷五十二



總校官庶吉士臣張能照

校對官檢討臣郭寅

謄錄監生臣馬嗣全